

隆昌縣志卷三十六

藝文

賦記銘詩傳

雲物山川點綴騷人之筆笙簧鼓吹瀟洒才士之  
篇古來鴻詞鉅製所爲寓目寫心而流芬奕代也  
隆邑名勝之區清淑所萃饒多風雅坐橋邊之夜  
月韻譜清輝玩洞口之飛泉賦賡逸響他如古寺  
深山碑碣所勒懿行雅範傳記所陳美不勝收於  
以彙爲蒸蔚仰沐  
聖教之敷用是廣厥蒐羅大昭

隆昌縣志

卷三十六

藝文

一

文明之化志藝文

金鵝洞賦

邑令

黃文理

繫蜀山之巽嶷兮峙千仞於遙空維蜀水之紆折  
兮寧九曲之深澗鍾靈蘊異兮表勝槩於寰中抱  
介含貞兮抗微塵於綺紅瀑飛如練兮泛銀河於  
溟濛厓厓奧渺兮象羽族於佳峒爾乃寥廓上浮  
峻嶒下鑿紫蓋超竒雲根磅礴金微杳靄玉笥橐  
淪蜿蜒如龍翱翔似鶴風暫低而將飄煙纔高而  
不落岫帶柳以媚川磴分流而歸壑當夫青陽司

候有鳴倉庚移芳植藻擢幹抽莖雨灑江唇瞻崖  
門之乍合花明嶺簇識谷口之初晴鐘乳倒垂掩  
映玻璃之色風鳴虛韻搖颺谷應之聲若乃炎蒸  
溷其長扇火雲赫而四舉藉翠草以成茵度清風  
於巖渚冪豐樹而爲幄聆層簷之燕語漁人鼓枻  
前汀兮歌翻遠浦幽禽戢羽巉巖兮菲微容與迨  
夫山亭霧蒲崖牖生涼香生蘭桂吐納芬芳蓮房  
墜粉兮爽薦銀塘離鴻嘹唳兮響發悠揚天晃朗  
而彌高兮丹字輝煌月照空而愈妍兮赤文采章

望有年於自古兮觸石兆其倉箱至若結素霜於  
深潭寒凝晷影掛珠簾於危巒凍含修綆崆嶲寂  
而蕭疏溪雲繞而閭靜漉奕千村藹深萬頃冰鑑  
湛然嵌空布景於是三才並四序成依斗極拱神  
京開靈邱之奧竅頌唐堯之德盛闡大塊之光華  
紀虞舜之聖明滄蟻大壑不減汝愚讀書之坪窳  
篠神居何殊生公說法之垠依島嶼而綿邈倚絕  
壁以飛騰涵清芬於一隅納萬有於羣生則有騷  
人縱目韻士披襟周覽四維遊眺怡情試觀寶洞

雲連昭坤維之翕闢  
邃澗風飄儼仙宮之呼吸  
如入獻花之場  
異香時襲恍瞻蝌蚪之文  
清標可挹青蓮桃片之謳  
髯蘇洲渚之什敬叔遐稽乎天台  
子長曠觀而負笈拾級捫蘿兮  
陟彼山巔扶筇着屐兮縱步爭先  
憩嶺畔兮腰佩懸撐火鈴兮獸炭  
然既無心而任物詎窒滯乎方圓  
匪希懷於蓬壺仙島聊一覽夫古蹟  
雩泉

石城山賦

山在叙郡

孝廉

喻其黃

邑人

界空白嶺兮勝金湯  
臨壓西南兮天一  
方大塊神

隆昌縣志

卷三十六

賦

三

力兮頓起陵岡不騫不崩兮  
建自洪荒太初迄今兮  
終夜堂皇朝旭團團兮  
山色光晚陰濛濛兮  
雲飛揚湍瀑環抱兮  
馬湖江郡治眺望兮  
居然四圍圓匝之保  
滿覽朱提之西峙兮  
互相翼爲應響願  
平梁之東橫兮未及  
茲嶺之規模獨軒昂  
梗楠鬱鬱葱葱兮  
氣爰萬丈蘭蕙間  
產深谷兮滿城幽香  
虎豹嘯聚其中兮  
何須登檀封拜  
猛將蛟龍定窟  
其下莫之敢撓兮  
安用短兵及長鎗  
力拔山氣蓋世兮  
項籍之強弓不張  
東西朔南非不周  
兮女媧

之風雷休得觸撞基址堅確其不可搖兮盤石更  
愈於苞桑世治而山城益覺其鞏固兮有道之天  
子當陽巖巖元氣之溶結兮社稷偕之以靈長南  
蠻望之凜凜兮獻圖納貢何異有周之西旅與越  
裳西戎仰之震疊兮渾似殷商之氏羗莫敢不來  
享而來王憶自渾沌盤古之代兮屹立以逮乎羲  
黃亦越唐虞三代以入漢唐宋明兮砥柱江南藩  
大邦從今傳之未窮兮一十二萬餘年正無疆

墨溪賦

郭

卓

邑歲貢生

隆昌縣志

卷三十六

賦

四

金鷺西陲祥州南濱星維井絡地接岷堙平原數  
里窳地千尋碧落爲號南溟其神樓峰爲其保障  
翠屏作其岸垠非關人工之鑿是乃造化之陳垂  
柳依依彷彿彭澤之渚行人隊隊依稀延平之津  
允矣漢唐之盛蹟洵哉天地以同春其爲狀也長  
不干畝廣可數廛淺能衣涉深與地穿時漲時消  
因溪流而上下或清或濁順天時以媮妍擬尾閭  
兮納百流而不溢比昆明兮含萬象而更元韋臯  
之詩題之不盡鄭虔之畫猫之難全懼推測而類

蠡實比擬乎松烟爾乃霧平兩岸含黑水春跳之  
竒日照孤洲兼石城早霞之異花燦紅崖樹含青  
翠觀魚梭之織浪悠悠意閒玩鷺影之攢波隱隱  
心醉若夫小艇泛泛浣女盈盈望潭水之澄空聽  
晚砧之餘嫋遊影娥於漢代尙覺婆娑誇清華於  
唐家猶嫌窈窕青霜紅葉滿村亭明月白蘆照池  
鳥地異溫泉尚來漚麻之婦水非火井長接寒酤  
之缸霰雪盈隄恍如滛池降王母綺羅遮畔何殊  
漢武宴曲江菱可食蓮可採隨景樂事竿可釣葦

隆昌縣志

卷三十六

賦

五

可航任意化居香氣襲人衣時發先賢之跡清光  
流澗口常停長者之車倘子雲遇之終當構宅若  
淵明到此亦應結廬豈徒登高作賦臨淵羨魚獨  
是古今頓殊興廢不一岸頭荒草堤邊榛室山谷  
之遺跡空留唐公之咏歌難悉問溪中之魚烏半  
化烟雲睇水底之芰荷盡爲土礮爲勒石不爭之  
瀦作山簡未遊之地達人觸之而感心騷客臨之  
而秉筆嗟物理之無常慨人事之相匹浣溪雖廢  
聲名自存錦亭未興風流不逸願假謳吟千言聊

當遨遊十日

樓峰聳翠賦

郭通邑貢生

天垂玉柱地挺靈邱凌青霄以上矗俯碧壑而寡  
儔近覓幽芳處處蒼松古柏遙睇峻嶺層層畫戟  
雲籌不假五丁之鑿何須匠巧識看三山共擬堪  
接斗牛勢嶙峋而挺秀錫嘉名以稱樓是誠千古  
之絕獻一邑之竒峯鷲嶺迢遙應多羽人寄跡烟  
霧橫鎖疑來仙客追蹤緩步循環何殊盤谷曲曲  
攀崖登躋不減阿閣重重結體則圓而多銳鑄形

隆昌縣志

卷三十六

賦

六

復濶而能容匪春羨南山之巖峙豈多讓東嶺之  
雲封第見巍巍乎駕培塿而特峻亭亭焉邁岡陵  
以孤聳拔地千仞不啻虎踞龍蟠聯雲咫尺時覺  
風高雪擁擢修架兮巖嵒望斗崖兮垂拱信足豁  
遊子之壯心起征夫以神竦也且也濯涼雨以彌  
鮮樹樹丹黃俛周原之清迥層層蒼翠抱清奇而  
縱觀懷景仰以適志寫春僅之靄若絢碧紛紅障  
夏木之鬱如飛烟鼓翅丹青罨畫盡歸隱約之中  
高下坡陁儼爲揖讓之致晶瑩輝蜀國塵埃却而

靜氣宜人麗采煥祥州日月照而燦爛錫瑞非岷山之導江豈秦樓之紀步徽音遙聞頌聲遠布蹇蘿履石而來賞心美景可遇扶筇拾級而上夾道佳禽自語含毫振采雖乏金聲玉振之詞執簡研思願呈沂水舞雩之賦

水峽口賦

郭其俊邑貢

嘗觀石城峙峻滇水揚清乃蜀南叙郡之盛地也維茲邑之東隅中有水峽焉一日西北浙江而淪一自東南曲流而□□於柏林潭潭亦東南之巨

隆昌縣志

卷三十六

賦

七八九

津也自是而清姿旋繞碧湍泓淨映雪山之皎潔濯錦里之瑩晶漪如沱水漣比玉京臨灘而激峽瀑石以飛鏗雪浪捲銀濤之萬斛明珠瀋玉髓之千頃正鷺水之盤冰而祥州之榮帶爰尋勝景級步高陵恍如蓬萊仙島酷肖紫澗赤城雖未觀海爲江流之滙合而已臨峽有潺湲之音聲况夫斫鎖蒼松岩逗香蘅陟陡山而石營中狹臨青石而裂跡引繩

高標攬一邑烟霞之勝隘港削青天罅之晴則  
是瞿塘峽口灑湏堆營儼然注於隆之東□

記

隆昌縣志記

明知府 江汝明 邑人

隆昌縣非舊也舊金鵞鎮驛以隆橋自國初始坎距榮昌百里許離之富順十損二兌之丙江十益二震之瀘州倍富爲川東西北衢輪蹄旁午成正間撫臣林湯二公疏設邑未報嘉靖中撫臣劉公踵疏亦未報頃撫臣譚公復力言之疏入制曰可縣稱隆昌隸敘郡割富里十有四榮僅四之瀘二之於是譚公偕蜀藩方公叙伯某公董其事建城郭邑治廟宇壇壝以及學校廨舍咸維新焉宇址

隆昌縣志

卷三十六 記

十

鬻諸民爲讐若干力役僉諸市泊寺僧爲丁若干林木鳩諸野爲梁棟榱桷等若干鐵冶陶甃匠石雜費皆取給公項上不糜官下不剝民而子來趨事爲正堂三楹穿堂三楹令衙五楹一幕廳一架庫大門以臺臺以鼓三楹椽各六楹申旌二亭共十楹繚垣丈百二十許盡木瓦締構經始於元年七月落成於明年四月王侯謁予問記予維茲邑之設歷經三朝豈不艱哉方二疏入告時諸議者僅鎮嘉明介三壤間地僻民龐猷弗克展於是撫

軍譚公因衆懇請奏允設縣合三壤而建治田其  
田人其人星摘其版圖而雲合之然後可得而邑  
也非譚公孰與慮始非吳公曷以譚令行非王侯  
曷以吳緒纘乎夫道有淵源政治所以日隆也治  
有根抵吏民所以昌盛也隆昌之名有咏哉有味  
哉蒞斯土者尚其旃旌爰掇數語勒石以垂久遠  
其詞曰金鷺之野厥山叢叢厥水舒舒天子命之  
煥爾邑矣邑之翼翼堂之屹屹猗歟休哉邦其永  
孚

渝城功過紀畧

贈兵部尚書

劉時俊 邑人

蜀自楊酋平後武備久弛天啟元年九月樊龍張彤平變隨據重慶全川震動忠州判官今陞推官胡平表義激石柱土司督其兵攻賊因奢寅反出遂由北路趨揀成都隨有鄉官董盡倫守備金富糾合鄉兵各數千人環江圍守重慶與二賊相持徐守道聞變星馳冒險赴任比至重慶即招募義勇提調平茶邑梅石耶三長官土司兵並督何舉人牟舉人及李大儒等之兵約共土漢兵二萬夔

隆昌縣志

卷三十六 記

十二

州府同知越其杰以赴任至夷陵從鄉官王非熊太史之議收合馬湖遵義援遼回川將潰之兵竝招羅網填兵約共一萬督赴重慶以上合共共數萬勢遂大振與賊大小血戰勝負相當董鄉官陣亡賊將亦多授首官兵遇損即增賊兵日減一日賊遂櫻城自守不敢分兵東下以浸涪萬據夔門竝不敢出郊遠掠故自賊變後以至次年四月頒發帑金與總督調發之大兵俱未到而能困賊蹙賊以成九仞之功者徐守道爲最越與胡次之董

鄉官死難固義烈無雙金富廉等之倡義以共抗賊鋒亦俱表表宜竝錄也至四月初而戴僉憲領兵三千至俊部下將官加銜守備李之信等領兵一千亦至是時賊勢已蹙而重慶爲戴僉憲舊治即有素習其行徑爲賊居間者僉憲遂遣家人與賊交通議撤佛圖關兵讓開大路使二賊擁其全部賊兵而去孰裏情由播在萬口俊不敢深言據僉憲刻有元愍就擒錄亦自謂於四月初四二十七等日屢遣親信家丁戴昌祚戴鎔入城矣是月

中甸邱監軍領毛兵三千楊監軍領毛兵一千杜總兵領家丁一千竝至胡州判復督石砭司兵自成都回射洪王知縣督楊守備領遵義兵三千皆至合兵連戰官兵小挫大勝賊勢愈蹙戴監軍復申讓路縱賊之議與賊面會並許以交卸印務護送歸巢城中士紳及父兄子弟伴送事在重慶士紳狀帖中僉憲刻錄亦云二十八日戴僉事與二賊扁舟會面蓋定此約也越兩日戴復偕邱楊二監軍會賊訂盟其刻錄可據是月抄盧張兩監軍

各領兵三千先後至月初二日俊部下將官加銜  
遊擊侯良柱等領兵四千至俊所招西楊貢生冉  
良翰監生冉良修土舍應襲冉天爵之母秦氏各  
兵共一千亦至先是俊於三月十三日自萬縣由  
陸路會總督於保寧令良柱由水路趨重慶一面  
合兵攻城一面相機諭降賊衆良柱至即於初三  
日傳俊之諭密招素所善原隸黃總兵部下令脇  
從之黃光綜周君命周順等光綜等從之遂於是  
夜獻城納我兵許爲內應戴僉憲因許賊讓路堅

守其約阻良柱等不許進兵自夜分開城門至天  
明良柱等不得進而機洩黃光綜等十八人遂奔  
投於良柱舟樊張二賊遂磔周君命於城下而奢  
寧遣兵二萬來援樊賊報將至矣俊自保寧轉至  
合州發部下將官加銜守備孫逢聖等領兵一千  
名前赴瀘州而自將督標兵千餘名直趨重慶部  
下水兵將官加銜守備姜周覃邦葵等領水兵三  
百八十名兵船一十八隻俱以初七日抵城下西  
陽土司兵亦至初八日俊會各鎮道是夜接唐報

賊兵至白節驛離城八十里官兵二萬皆却走初九日會議俊問發兵迎戰之詳因嘆曰賊鋒甚銳宜發銳兵迎敵以挫其氣如某營某營皆鄉兵未經大陣不宜遣某某土司雖有土兵之名其實土兵以時久皆回借鄉兵充數冒餉亦不宜遣侯良柱兵到又不一體給餉再三哀求止人給米三升驅之迎賊遠信地嚴限令俾一夜走八十里兵士忿怨良柱大哭而去如此發遣何以鼓舞人心且各營既退走一軍不能獨存安得不敗語未畢邱

監軍怒甚俊曰全川安危在此一舉俊宗親墳墓恐遂永訣乃竟不容俊一開口耶戴監軍聞之亦怒是夜報官兵萬餘復却走先是越同知督馬湖遵義等兵圍城數月屢戰有功戴與邱妒之譖於總督總督遂調其兵於瀘州且下檄曰越同知駐兵重慶有碍成功如不即赴瀘州口鎖拿解越同知憤極欲自殺既發兵行瀘州矣而賊之援兵大至各監軍仍發令追回各兵怨望不肯返俊遇於途次急召其將官張鍾秀唐天貴夏德勝王懋官

等嚴諭之各應諾蓋俊於四月內先行牌勉諭各  
獎厲銀十兩各將士感恩樂用故也至是聽令速  
回監軍遂遣之迎敵比遇賊而鍾秀等兵到未齊  
扎營未定故亦望風而走是時人心大震鎮道倉  
惶初十日齊集水月庵會讓俊秉筆俊相讓久之  
俊謂事急矣何敢固讓遂秉筆部分與鎮道同心  
協議俊謂賊兵雖銳我之應着恰緊乃在佛圖關  
俊請駐兵關上使城中賊不得衝突而出以與援  
兵合其過江堵截之兵在精不在多如某營某營

之鄉兵止可據江對各城門而守以壯聲勢鎮道  
以爲然僉議某營於某處扎營某營於某處把隘  
又恐內外賊奪船或駕筏渡江相合議俊兼管兩  
江信地督部下水兵兼督各哨營船巡守之部分  
既定俊遂責問連潰狀行軍法以肅軍心是日各  
營齊發軍威大震鎮道會議之時言及讓路放賊  
俊力爭之惟徐守道與俊議合語載前一次辯疏  
中俊是日駐兵關上以防賊衝正以破讓路之計  
也十一日二賊晝出城中兵迎戰於兩路口欲盡

力衝關以合外賊俊督兵三戰三敗之賊退走閉城從此遂不敢再出而江南堵截之兵連戰皆捷蓋盧監軍所統內有牟海龍一枝千餘兵最稱勁銳令之衝鋒張監軍率所統辰州兵及羅網埧兵繼進故一勝火器盡歸於北兵使之營於南城坪賊衝之多被傷故再勝俊於會議時對邱監軍問徐守道曰越同知有碍成功之說信然乎徐攢眉應曰那有這話邱無以答俊感嘆不覺泣下越與將士聞之亦泣下思奮矣俊因遣將官劉榮先毛

明志執紅旌督戰遂爭先摧敵故又再勝十二日某營兵少劫賊分營於南紀門之對岸離江里許使人登山頂與城之賊相呼應城上人曰你們進來江外賊曰你們過江來而水兵與關上兵防守甚固兩賊相望各不能奪船渡江以相合併十三日賊遂退漢土各營兵追及之遂大敗走墮崖溺水者無數其餘盡殲於各州縣之鄉兵無得脫者蓋自有酋患以來僅此戰得意而樊張二賊始命遊釜底矣十五十七十八等日賊三投稟帖催戴

僉憲讓路而俊不許賊使城中被陷士民兩投  
狀云戴祖爺已許讓路懇乞天臺開恩釋放而俊  
不許復使倪封官監生兩具訴狀一云前士民具  
訴蒙戴祖臺許賜讓路昨又具訴亦同前詞又一  
云前士民具訴蒙戴祖臺許交印護送城中縉紳  
及父兄子弟伴送至中途昨又具訴亦同前詞伏  
乞天臺開恩酌確解網封官復貽一書詞意與訴  
詞同而俊皆不許賊勢窘甚遂登城怒罵戴僉憲  
謂其屢次受了厚賄許了讓路如何不讓先是戴

僉憲第二次扁舟會賊邱楊二監軍偕焉邱既附  
和讓路之說而楊欲急紓邦鄉之難對賊指天日  
誓子孫語尤諄切至是賊稟帖訴狀之催逼與城  
頭之叫罵專斤戴而不及楊邱者爲戴有私約有  
別話而楊邱無染也是時大足高知縣領兵千餘  
至俊既掃斷異議一意攻城與楊監軍屢次臨城  
督攻又與楊監軍乘水艇週迴兩江細察城形某  
處可攀某門可襲於十九日部分本營兵及石砮  
遵義等兵乘夜急功通遠門密發紅旗督酉楊土

司精選衝鋒於臨江門之傍偷路登城先兩時傳各營準備候號火接應至四鼓時分西陽兵登城殺守城賊百餘人燒敵樓五十餘間火光燭天喊聲震地惟盧監軍遣牟海龍應之已奪開臨江門而戴僉憲阻各營軍不進賊復據門拒守功不就詳戴前第一次疏中戴僉憲因堅守賊約不受脇從之降俊動色力争豎招降旗給降者免死印票又嚴拿賣米賊前後梟斬共數千人城中斗米萬錢亦無賣者賊衆益降益散二賊之命在懸絲矣

先是俊會總督於保寧知鎮道有放還二賊之說俊謂樊龍首惡必可寬如張彤輩能斬之以出降即當先免死但不宜殺降失信阻水藺部下諸人歸順之心如曩時播事食言諸酋以爲口實總督然之隨請印帖爲照許張彤等縛獻樊龍免死俊至重慶遣羅千總羅現入城說張彤戴僉憲妒俊之計先事洩機於樊賊現入城爲樊賊所執唱殺之張彤力勸乃免遂禁秘室中不肯放出至是賊勢甚窘叫罵戴僉憲益急俊遣將官侯良柱楊應

岳都建極李之信等問二賊何故不放羅現二賊扮作小兵上城答話有認識之者曰你即樊爺張爺也二賊曰然因問劉老爺何在各將指俊泊舟處一賊下拜叩四首前此賊見戴與邱楊各監軍惟高舉手一拱至是拜叩將士異之二賊曰爲我頂上劉老爺你說樊龍張彤在此叩頭前日人言說亂了我們商量未定不敢遣羅現出來回話今日隨劉老爺分咐看叫如何無不聽命等一場大功成於劉老爺之手時戴僉憲所遣羅生員同在

因曰戴道爺叫來傳話樊龍大怒曰再莫提起戴道爺來說一番話又要許多銀子我府庫有限都犒賞軍士去了少頃張彤閃過樊龍謂諸將曰你替我稟上劉老爺我張彤豈是不曉事的朝廷費了許多兵馬錢糧難道恁的罷了要我張彤立功卻也不難專待劉老爺分咐此盖有意殺樊龍也語在第二辯疏中疏語略茲詳之羅生員戴之所遣見在重慶可問也諸將回報俊復使將官雷正乾周鎮傳諭石永高永高遣其親信土目樂富出

降亦有意殺樊龍矣時爲五月二十三日也而薛  
總兵至其部下守備孔大成因與一賊有舊入城  
說隆鎮道許二賊以交質送歸議賊以二子質於  
官官以二武弁質於賊與前說稍異前議撤兵而  
今不撤兵前云戴僉憲護送縉紳伴送而今止伴  
送以爲質之武弁前議賊兵數千盡隨賊兵以去而  
今止許二賊帶親兵數百其餘留下收入各營然  
總之亦縱賊耳俊謂賊勢已潰旦夕成擒如何可  
縱之去即誘降失信亦爲不可况真欲縱賊乎或

曰已受總督秘意矣俊不敢強爭亦不敢赴水月  
庵會議俊聞徐守道言於公會曰今日之事當以  
劉勿所之言爲正受其降則可縱之去則不可也  
是日二弁入質賊二子出質二十七日俊不欲與  
水月堂之事挽舟而上至於離城五里間因聞徐  
守道之言遂放小艇而下與徐面會徐曰此議行  
各土司官必不肯俊曰然盖知人心忿忿多不服  
也是日張彤石永高出與鎮道訂約張石入樊龍  
出戴楊兩監軍迎之於舟楊復遣其所親曾陳二

生再爲質以堅樊賊之信土司兵起曾陳二生一打傷一殺傷幸得返走戴楊與樊賊甫相見樊賊急欲轉楊監軍攜其手拉以登舟土司哨船漸集樊賊不得脫遂挾之登北岸盖戴與賊有私約故主於放歸楊監軍雖和放賊之議而原無私約止求集事故臨機轉念因變爲功遂不專主於放賊也是時各鎮道方着吉服端立於水月庵堂上受降土兵擁樊龍至甫跪地土官傍立一揺首土兵争縛樊龍衆手交加而樊龍肢體頭顱登時碎裂

二總鎮與各監軍越牆奔散各不相顧土兵亂而官兵亦亂矣亂兵入城放火搶掠賊兵潰散張彤挾賊黨四十餘人奪路以逃盖有受賄傳字號放張彤匿賊衆於營中者故各兵入城所殺者多街傍跪迎之居民擒斬土苗甚少而入城爲質之二弁不知下落盖爲無名氏之鬼矣俊是時聞樊賊就縛乃放舟而欲與鎮道計義約束各兵鎮道俱遁匿不知所在至次日會戴監軍與各道止聞張彤實逃竝不知樊龍生死狀也俊謂義憤發於土

司方欲行牌諭獎竝使約束其所部而總督有怒  
俊之語傳到遂放丹徑卜不敢具疏報捷亦不敢  
復問重慶城中事矣就裏詳悉總裁在前疏揭中  
故論復城宜首叙從前困圍之功蓋其心苦功難  
而其時最久此徐守道與文武存歿諸官之勞績  
卓乎不可抑也後方概及於鎮道竝各郡縣之在  
行間者以及漢土諸官若俊何敢言功或庶幾免  
於罪咎耳而全川之事畢竟爲放賊一說所誤請  
畧言之先是俊因有遼事物色將材至是招呼咸

樂爲用而俊未至重慶時先發銀幣數百兩獎勵  
各土司竝各營將官特行苦詞勸免諭一字一血  
將士感奮即各土司亦委心效力故約束易行俊  
因前覷破人情有謝事之意徐守道謂俊曰公如  
何可去公一去則土司兵難控馭矣至是賊困欲  
降城破在一二日內而俊爲戴僉憲所妒譖總督  
牌到欲俊之兵與各監軍之兵俱交與杜總鎮蓋  
惑於戴不欲俊分復城之功也俊即以二十五日  
交兵而各營兵將與總鎮南北異宜驟難聯貫各

土司驕恣抗倨總鎮之號令不行猶幸賊命已盡  
不生他變而將士既解體矣一聞交質放賊之說  
衆心不服土官憤而土兵遂亂官兵乘之亦亂亂  
兵入城有何紀律遂爾放火延燒滿城廬舍一夜  
盡成馬土逢人亂殺逢婦女卽擄又搜檢搶掠寸  
土皆翻庫藏之原藏與賊衆之劫掠其分貯於重  
慶城中者豈止數十萬至累晝連夜皆入土漢各  
兵之手而總有所歸是非復重慶乃剿重慶也哀  
此渝城惡劫未盡彼中縉紳士庶痛入骨髓所不

必言卽亂兵起時鎮道既越墻遁去將臺之上不  
復睹漢官威儀是何景象成何國體遂使忠義灰  
心夷司鴛驚殃民辱國是誰執其咎也且兵一亂  
而總鎮之軍令不行而土漢兵遂散歸者歸逃者  
逃有如杜總鎮疏內所云者鎮道亦計窮莫可收  
拾告病者告病討差者討差酋方虎負而梟張我  
乃歸牛而放馬於是遣發無人師期遂失以至江  
門之役孤軍獨進而楊總鎮郭推官大小將領及  
官兵二萬血化陳濤之水於是賊兵乘勝轉功建

武良將龔萬祿全軍俱歿南邊六縣重洗一空而叙南亦遂大震於是遵義復破馮推官死焉叅將周之德竝不言及下落川局難結咎又在於誰也俊第一次辨疏內云通前徹後武吏文臣計醜心弘疾功黷貨失機僨事以致養寇老師種種諸罪蓋既專有所指惟時止聞總督傳語未知僉憲揭陷故稍存雅道不直斥其姓名及見僉憲之揭再上辨疏始婉露其受賄護賊之事僉憲見事情敗露心亂詞窮乃於途次一揭入京一疏娓娓辨飾

自相矛盾欲諱撤兵讓路交印護送之說而有倪封官倪監生兩訐狀一書啟俱在鐵案不可磨滅疏揭中徑不照管而托長安相知者爲之解嘲曰欲護送者非我也楊華毓監軍也至於放賊之說辨揭內則不肯招承謂俊憾之無以中之及突而生出力主放賊一段又突而生出向賊索金一段無中生有虛中翻弄云云復捏爲應對諸公之語而終之曰職力主放之職又力主擒斬之何兩截不相照應若此噫僉憲之語則辨矣然力主放賊

者僉憲也擒斬賊者土司官兵非僉憲主力也是非僉憲兩截不相照應乃僉憲與土官爾意各行不相照應也僉憲既發揭於途次云云如此比入京又轉念細商謂放賊之說已經屢議難以平白推開遂將錯就真明明招認乃出一辯疏云時俊謂臣數遣家人入城臣實數遣家人入城臣不數遣家人入城何由仰仗皇上之天威以秘行臣等之一得謂臣與賊交盟臣實與賊交盟臣不與賊交盟何由使賊信臣卒近臣謂臣力主放賊臣實

力主放賊臣不力主放賊賊必不感激臣賊不感激臣臣必不能使賊歸附臣噫僉憲之辯則利□第所謂秘行者是何一得不過曰讓路也交印□送也賊若信戴感激戴何爲又登城詈戴直發□行賄之情且其近戴也信說降之孔守備信爲質之二弁而非信戴也亦非感激戴而歸附也今謂力主放賊卽爲擒賊誘賊之本謀噫從古以來有卽放卽擒事相反而相成若此者耶僉憲又欲諱受賄之說而渝城紳衿漢土將卒全川土庶各屬

官僚衆視衆指不能塗飾樊賊與賊衆之口又供吐甚明遂不覺啟口囁嚅辨揭中爲虛活語曰若云向賊索金則所不必辨何也今解到各賊可一一拷而訊也揭既云云如此已復轉念細商謂事難終諱不宜不認而又不肯直認乃於辨疏內影響照應隱隱招承內云臣等所爲更有出於遣家人入城出於與賊交盟出於力主放賊之外者故爲謎語使人莫可猜摩而暮夜形踪悉入此中消納於是通賊護賊盡爲妙筭神機接白受黃盡道

千辛萬苦而單詞易惑君子可欺遂亦有過信而不疑者而從前士紳之指摘賊口之叫罵一旦變爲稱功叙績之說噫僉憲巧則巧矣此真化鐵爲金之術又是禪和子放是不放不殺是殺之誑語機鋒乃敢於君父之前章奏之內游詞游舌橫賴胡遮若此豈敢謂冲聖可罔濟濟朝列遂無繞朝之鞭乎今試問僉憲旣謂力主殺賊欲以縱爲擒何不多方以誤之設伏以待之而乃許以交印護送縉紳伴送若使俊不力阻俊之兵不當關則賊

已脫兔而去豈肯束身而來我既付性命於其掌中彼豈授身首於士兵之手又使交質之後土官兵不從中突變則爲質之二弁豈肯遂作捨命王鎮道遣質入城時豈真先棄此二命樊龍旣恃有此質筭穩以出亦即挾此爲質安穩以還則生歸不獨一張彤矣噫渝城之事誰罪誰功公道良心豈宜盡泯此輿論一定論也如僉憲不認讓路護送之說請自解於倪封官倪公子兩訢詞一手啟如謂俊力阻讓路之說爲無據即請質之徐守道

公會私會之語井守道之手札札云渝城之賊久而不下台臺軍令一申罪人斯得蓋由恩信素孚彈壓得體不佞前日之言非謬也所謂恩信彈壓等語俊何敢當而前日之言必爲有據卽水月堂上所謂今日之事當以劉言爲正云云與會俊時所謂公一動則土司難馭之說是也一場大公案惟前日之言四字堪爲憑據以存公道之餼羊耳然寧惟徐帖可據卽戴僉憲之塘報亦可據初報曰生擒樊龍死於亂兵之手試問戴僉曰兵何以

亂兵亂時總兵作何約束僉憲作何舉止何以招降受降其生其死踰一日而尙不知端的再問僉憲曰兵到重慶凡幾月何以自立塘報日報虛功俊旣擁兵七千餘僭部分秉筆何以一報屢報始終不列俊之銜姓何以上而總督撫按中而同事鎮道下而與事之各郡縣各紳衿各土漢將領或久或近之苦心一概抹煞如僉憲不認虛冒則遵義初復在天啟元年十二月十六日當是時僉憲何日出都門何日會俊於邯鄲道上何日發諭帖

何人傳塘板而乃自添銜名遍報於在京在外各衙門云遵義之復奉劉太僕戴監軍之諭帖又請遍質於川中士紳軍民人等張彤是逃是死有無賣放而敢以假首級欺君再問黃光綜不得已而陷於賊中開門獻城僉憲何敢阻兵不進又何故不錄其功卽僉憲所刻之執訊錄亦云光綜不妄殺人矣何故反功爲罪冒之以僞叅政之號充入俘囚之數而服之以梟斬之刑再問僉憲播事旣平之後解俘獻闕者僅一史同知不煩監軍道也

今所獻者徐周鼎何苦海原係朱撫院王巡道之傳諭賊黨縛獻轅門其在重慶城中或先期報降或城潰後被獲惟有賊之假子與傅文進石永高此外或舊將或小兵或土或商皆被陷賊中逃難投生之人耳藺巢未搗酋勢方張豈收場結局之日僉憲首被監軍之命何不乘破城之聲勢催督兵將以濟瀘納之師乃贅此一行止圖彌縫粉飾掩罪掠功毀人成己超陞冒敘而不顧蹶將喪師之禍且僉憲疏揭中自敘其功云扁舟渡江三諭

諸賊手攜兩巨憇徑至水月庵今查第一次僉憲私會與賊定護送之約是已第二次同會者邱與楊也中間入城說賊者薛總兵部下之孔守備也隆議既定樊賊出城攜手登舟者楊監軍也所攜者樊賊一巨憇非兩巨憇也說降之說不言孔守備則亦已矣今以攜賊手登舟爲功則掩楊而歸於己以護賊送賊爲罪則諱己而推於楊如楊而果欲護送也何以士紳之訢詞書帖不言楊憲長而一則曰戴祖臺再則曰戴公祖乎噫僉憲旣已

亂軍政悞封疆而又顛倒掀翻如此勿謂朝廷大  
勿謂天地寬一人足以攬亂矣即今冲主在上國  
步多艱全賴公道二字維持厄運乃使是非倒置  
功罪混淆勿論傳聞海宇人心不服且恐書之史  
冊萬世之下謂天啟二年某月日川事云云將使  
有識者以此一事定世道之升降人心之存亡也  
豈淺鮮哉

護國寺建坊碑記

明太師 申時行

盖聞造寺起於伽水闢苑肇自耆山迨竺經一譯

隆昌縣志

卷三十六

記

二十一

於摩騰而蓮刹輒彌於震旦良由聖靈周遍乎百  
億像法皈依於大千上自王公下至庶士靡不躬  
禮菩提心崇正覺所謂分金光之末照涉願海之  
慈波者矣古稱西蜀其佳山水不乏而甲於富隆  
之縣治以東者奠若翠峰山景泰三年建寺曰普  
照指須彌巔而作供臨清淨海以爲池信真形示  
現之區實大衆皈依之境歷年既久勝事難常樑  
棟傾摧墻垣墜圯將萬載福地漸委於邱墟千種  
金容幾委於風雨越自庚寅之歲嘗重修以煥其

規今甲辰之春新構以擴其蹟仰承勅建之鉅典  
遂更護國之徽名像紫極以壯基擬黃圖而抗殿  
時維寺僧夙稟剎根堅持戒律遠接少林之宗派  
洞曉不二之圓詮奮然力破羣疑槩焉誓成慧業  
亟捨鉢貲徧聚颺施揆日準繩礪金礪石椽題軒  
翥坊宇高驤賜書璀璨於琅函題額昭垂於銀榜  
飛薨巖巖積拱璘珣精舍宛如毘城仙輪無異蜀  
國堂構隆於盛際莊嚴倍於曩時梵唄與寶譯諧  
鳴天花偕芳蓮競馥蕭公鼎峙既幸托重宰官身

隆昌縣志

卷三十六

記

三十二

妙剎星輝常朝仗諸長者力光來東壁燈傳數比  
於河沙釐祝比辰圖鞏永圖於山岳助成善士並  
勒瑱珉云

關帝廟碑記

明布政

熊應占

邑人

三義侯誰在昔桃園以異姓結爲兄若弟者是迹  
其所結之名所執之義業已剖君臣局面矣維時  
先主以兄道治闡內關張以弟道治闡外又得隆  
中卧人應三顧起定策取荆收益以發憤其義氣  
而雄壯其義胆戮力匡時恢復神器君子曰蜀漢

帝業蓋自隆中畫策已定卽謂之隆中蜀漢也可  
堂堂正統可不謂美而彰耶崇禎庚午西粵朱邑  
侯蒞隆隆衝邑也凋敝傾圮兵燹之後滋甚下車  
四顧愀然銳志興廢以治人事神爲急務首重學  
宮暨次丹雘明神祠廟次第輝煌凡可禦災捍患  
保又元元者裡祀不朽闔邑煥然改色士民佩戴  
喧在口碑侯也夙高義三公燃炎漢之灰得國統  
之正建祠鏤像春秋祀之于是乎蜀漢之美又在  
隆中矣凜凜正氣可不謂盛而傳耶占曩在京省

關張專祠郡縣亦然至昭烈合祠少有聞焉爰考  
肅皇帝二十三年重建三義廟御製碑文重帝統  
重大義也歷代君臣萬古僅見朝廷且特表而出  
之矧在吾蜀如之何勿祀祀之乃今自隆始猗歟  
休哉此一舉也天牖之耶噫厥初生侯命名已露  
其端倪焉知其非隆中卧者後身而借吾隆爲權  
輿以昌發其鴻駿乎不則隆邑荒墟露零霜肅突  
森嚴其廟貌飛靈爽而幸臨夫豈偶然猗歟休哉  
蜀漢兄弟若非隆中仙子引翼之則赤精幾於衰

歆漢君臣若非隆中仙令祠祀之則白帝胡以重  
光而今而後隆之父老士庶一度顧瞻祠像一度  
稱頌侯功祠之萬古如茲侯之功萬年不朽其與  
時俗生祠塗人耳目去則已焉奚翅霄壤耶雖然  
侯之鴻功此祠焉已哉侯之駿業此縣焉已哉計  
侯政三載底績且將以報績矣太史傳循良天子  
旌章服其以予言爲左券

楊貞烈祠記

大學士 王應雄

夫辭之不可已也蜀女子有淑先雄者事與曹娥

隆昌縣志

卷三十六

記

三十四

絕類而黃絹之文無傳傷哉唐李翱叙高愍女楊  
烈婦自謂不在班孟監蔡伯喈下豈非事竒文核  
耶辭之不可已也如是作楊氏貞烈祠記昔孔子  
讀詩至柏舟曰仁矣吾於柏舟見匹夫不可奪志  
也志士仁人嗜義而死死而得所詎易易哉求於  
褒博竝議之士或不得乃得之巾髮者流而說者  
以名心繩之悲夫孰謂女子婦人而甘名以死死  
而死耳烏知名且名欲不隨之能已乎余聞有司  
之祠貞烈而奮以熹及覩其事狀遺文又無不悽

焉以悲者傳曰貞烈者楊中丞某之仲女小字二  
姑母王孺人生萬曆壬午年七月十五日甫三歲  
偶抱入家塾指授壁間句輒成誦稍長習孝經烈  
女傳內則諸書已益習女紅丙申歸郭生懋宏宏  
父某官和州從之和會姑病祈以身代姑病良已  
己亥王孺人死庚子自和歸始知也一慟絕良久  
乃甦代翁姑侍王父母王父母深自慰藉與郭生  
相敬如賓佐治舉子業如畏友生力學而羸且病  
瘵已而病益劇刲股和藥以進竟弗起持踵訣曰

修短天也其若敖餒何貞烈泣拜床下搏胸搶地  
誓以身殉家人防之密弗獲遂中丞寬譬之汝忘  
訣詩語乎微汝誰爲計者逾年翁姑歸中丞乃迎  
貞烈於家謝膏沐掃一室奉大士像列圖史自娛  
顧意中悒悒未嘗忘蓐螻蟻也當是時死易立孤  
難無孤也欲誰立者無已從中丞官京師聞其姒  
錢再舉子則喜曰藉以報地下者其在此矣時郭  
翁守曲靖萬里持幣書乞嗣姒依違之再三約始定  
丙辰秋中丞持節過里會其姑姒家居抵舍之夕

貞烈卽取嗣子視眠目喜不自勝丁巳請王父大會宗黨名嗣子曰孝懿告于廟禮成謂其侍鬢曰吾事畢矣吾亟歸寧詰朝往大雨中道返懊甚明日閉樓作書徹夜繞閣走不寐又明日呼車子如中丞所中丞察其色殊慘而謬爲欸語心疑異戒一嫗謹持之浹旬稍懈報女經矣端坐瞑目含笑以死時五月二十日也含衾斂襦罔非夙庀一素練縫紉密緻女奴云是告廟次夕裂帛以製啟笥得三紙則繞夜所寫者其一與中丞其一與諸母

其一與諸弟阿姊又得絕命詞於衣帶間自前與生訣時佩之矣其詞曰妾心一片鐵不與紅爐滅煢煢未亡人茹苦肱九折一死鴻毛輕豈受風塵繼妾髮可剪頭可截悲哉何其烈也嗚呼從容較慷慨也有異貞烈稱未亾人且九年餘又孤已立矣假令中道氣阻悠悠終天年誰曰非高行者而卒踐旦旦之誓夫其視九年猶朝暮也視九年徃之執手契濶猶宿諾也視一日之未畢志猶負之未謝而九原之與俱猶飴之甚甘也求仁得仁又

何憾大史氏曰以余所聞楊氏蓋世有女德云中丞王父以上有祖姑者生而孤幼弟孱甚如杙上肉姑終身弗字以貞義稱撫幼弟成立蕃衍至今歲時祭祀無忘貞義也越六十年而有貞烈語云醴泉無源芝蘭無根豈其然

建修學宮記

督學使 方 覲

學校爲教化之本所在郡邑苟實體

國家所以立學之意振興作育其勢近而易行其效捷而可勸顧今之有司惟簿書期會以爲稱職教化

隆昌縣志

卷三十九

記

三十七

之宜先渺不知務或以邑處凋敝其賢有志於此者又苦於力之莫結學之興也蓋亦難矣蜀遭獻賊之亂所至蹂躪郡邑學宮大半蕩爲灰燼蒞其土者或勉焉以爲釋菜之地卒皆卑陋制不能備隆昌之學僅殿屋三楹中祀

先聖旣復圯壞春秋楮書牌位以祭事竟奉而焚之相沿旣久今劉君至而病焉因其舊址鳩工庀材創立盡制殿廡宏敞齋祭之室講習之堂繚以周垣庖庫祭器俱備置經書其中外樹綽楔戟門泮池

皆如武學官舊僦民居乃各爲廨舍計爲資一千二百餘金除邑中紳士捐助四百餘金外皆其所措置不足則傾橐成之纖粟不以累民以其用力之難閱四歲乃竣於是隆昌之學巍然煥然皆向所未有劉君之爲此可謂知所先務而其用力亦已至矣初予歷試列郡所過見學宮頽壞屢捐貲修治每考校時進多士而教之輒亶亶不能置然三年中歷試列郡僅得與諸生再相見其爲耳提面命者固不如賢有司之親且久也使爲守令者

得如劉君數百十輩崇重學校而訓課其子弟雖古者立教之法禮樂節文之詳有所不得盡行然士入其中而使之講明禮法知其學問器識文藝久之必皆可觀其有裨於教化也豈淺鮮哉劉君名琨字右祖號石齋雲南大和縣人康熙己卯舉於鄉丙申謁選得今職爲政清靜應事明敏吏民安之故得其餘力而經營於斯也工竟上其事於制府司馬年公深用褒美謂余忝學校之職而樂觀成也因屬爲紀以示永久云

重修泮池記

教諭 李時敏

先王崇首善之區所以造士興賢化民成俗胥天下美才而陶冶之厥由於學而俊秀偕升恒自泮池發軔顧學校之建郡邑皆然求其雅意作人鼓舞而培植者未易數數觀隆邑在先明人文蔚起忠孝節義賢豪奮興因兵燹蹂躪學校榛蕪我聖朝深仁厚澤漸摩鈞陶生齒日繁人才輩出康熙五十七年劉邑侯見學宮傾圮大爲振修宮殿宏敞丹漆黝堊煥然更新獨未建修泮池殊非古制邑

隆昌縣志

卷三十六

記

三十九

侯王公來宰茲土民安其居士樂其業尤加意學校泮壁增輝芹藻生色辛亥歲慨然有創修泮池之志余偕司訓王君交贊其美遂捐廉俸以興厥工鑿泮池於櫺星門外上修泮池礪三座規制盡善墻垣俱整而學宮於斯全美矣事竣邑紳士挽余序以垂永久余曰物不自美因人而彰隆邑之學由來舊矣肇建於有明王公寵朱公治隆重新於劉公琨而覺侯王公廣施德教復爲重修焉所以先後繼美人才相接踵者詎不以作育而培養

之得其人與夫習學類宮原由升堂以入室而泮池入室之基也自茲以往不爭自濯磨以漸窺天美富他日人文益盛無負

國家之興賢而育德者悉兆於斯則此舉之有造於學校也豈淺鮮哉是爲記

高洞寺記

邑令 祁 蘇

余於康熙戊戌春二月綰符隆昌百凡舉錯張弛未見施行不暇計及遂志適情也益州沃壤千里古稱饒裕名世迭興焉罹賊獻忠寇蜀劫灰滿地

隆昌縣志

卷三十六 記

四十

竟成一片邱墟而川南一帶尤爲往來蹂躪之所幸我

朝定鼎奮揚武烈掃蕩流氛海宇昇平年來蠲租減賦更蒙加意招徠休養生息非復一片邱墟之境矣夫隆昌彈丸一邑居敘馬瀘永之交衝界連東川當重夔遵順之孔道夫馬絡繹疲於奔命不遑暇豫豈能遊騁心志閒適性情可以尋山問水會當招徠墾荒以復額賦新舊紛爭互相構釁官斯土者鞅掌簿書刻無寧晷心倦神疲有不能退食

之瘁安得半日間尋名勝巨蹟結清涼因緣然而適志達情根於性也適因清畝平訟親詣西鄉遙望喬木陰翳高踞青岑知爲洞天福地歷劫尙存自有鬼神竒靈默爲呵護即之又見層臺傑閣高出樹巔隱顯如畫徐聞午鐘悠揚梵唄清越長松老柏際地蟠天翠竹蒼梧吟風嘯月崇山踞後蒼翠欲滴環瀑飛前潺湲入聽從人告予曰此高洞寺也乃舍車而徒高明宏敞洞豁入窻廊廡幽潔心志因而漸爽性情爲之一舒簿書鞅掌之人到

此陡作林泉想久之道心澄澈雲影天光照耀入目花香鳥語意態襲人殊達情而適志焉寺僧行澤向予請曰茲寺創自宏治間雖仗佛力不落劫灰而年久傾圮僧師靜潔志欲重修躊躇三十五年而未遂其願今僧又垂老恐再遷延負師所托於是備歷艱辛稍成素志建始於戊子落成於辛卯乞公言以記其始末則斯山之靈永垂不朽余聞而有感焉古今之興廢何常視乎後人之立志志堅矣而用情未正則舉動乖張安克繼志前人

恢復舊制哉如行澤者志堅矣而情復正乃恪遵師訓而光大之可謂入空門而不空矣隆昌徧地劫灰而寺猶存且能復舊是地效其靈也靜潔有志而未逮至行澤而功成是人擅其傑也又能闢曠土以永香火躬耕鑿以贍僧衆吁行澤者可謂志得其堅而情適於性者也予樂聞其說而爲之記

普濟寺記

邑令 劉 琨

寺何以名普濟乎以其地當孔道往來之人憇息其間喜得綠樹濃陰廣覆其上又得僧人嘗以苦

隆昌縣志

卷三十六 記

四十二

茶清水解人煩渴故咸欲廣其規制永其香火此紺殿之成田畝之施所由來也隆昌建自前明隆慶二年迄今幾二百祀矣時無古蹟竒踪足輝簡策者而郡乘所載金鷲灘之外僅傳石鼓石鑼在土地坎左右且有宋人所書鄉校二字是此地清幽險峻爲隆邑之首出也予於丙申夏奉宰隆邑隆荒邑而又衝衢也當東南之孔道往來之差使如織錦而居民之烟火似辰星以此應使民之疲亦官之疲也縱有佳茗清水其如此煩苦何幸

聖天子德威遠暨又各上憲招徠多方而楚粵閩豫滇  
黔秦浙之民紛紛至止於是戶口漸增田地日闢  
差雖繁而不疲地雖衝而民樂業予因得告無罪  
於上下之間且得餘力焉以興廢修墜之事酌其  
緩急先其大者故首建學宮而前後左右俱煥然  
矣次及武侯祠城隍祠而廟貌聿新矣又鼎建羅  
漢寺祝國寺報恩寺太平寺吉祥寺太和宮而佛  
刹仙宮皆金碧輝煌矣次修補城垣數百丈鼎建  
四門城樓而金城壯麗矣七載以來無日不以興

廢修墜爲事而土地坎之觀音殿茶庵則闕焉而  
未之及也歲之六月邑之士民詣予請曰邑之載  
在郡乘者水惟金鷺山惟鑼鼓土地坎介乎其間  
而觀音殿又居乎其上僧人於此施茶多年矣行  
人賴之但僅小屋數椽非久遠計也請擴而大之  
予曰然是予之志也但工費甚多爾等肯各破吝  
囊乎衆應曰諾予於是捐二十金付彼而去遠近  
士民各出布帛錢穀鳩工取材又得木匠王文生  
自願全捐工價是以不數月而功成矣其磚瓦之

費尙未足用余又捐十餘金以完其事但殿大而佛像甚小似不相稱移西鄉廢寺鐵鑄古佛一尊居中以舊庵觀音居左予又繡白衣大士居右一佛二菩薩皆遍體裝金而成當衝之大梵剎矣前構茶廳三間中關帝又建過路涼亭以爲行人憩息之所山茗之奉湯水之供較昔爲多予恐久而廢墜又清出寺之左右前後田畝山地歲收籽粒以爲飯僧供佛之資並應往來茶木之費因易其名爲普濟寺蓋欲人之顧名思義而後先承繼以普及於不朽云

重修學宮記

雲南提學 胡克開 邑人

嘗讀易於坎離鼎革三致意焉蓋坎受以離革受以鼎何以故離爲火象文明也鼎取烹象維新也而革從澤鼎從木有皆從火生水水火新故之際微矣哉山川風氣有鬱必開天欲啟文明之運而使之新必得一偉人適肩其事而拓之故坎離而先以大過非有大過人之才弗勝也凡物之興各有定數况學宮重地關聖天子教化者哉隆邑襟

帶玉屏鷺江雄峙天柱樓峯風氣清淑輪蹄輻輳  
爲敘南岩邑邇來人文蔚起砥礪名行彬彬質有  
其文而文廟殿楹傾圮非所以肅廟祀也邑侯朱  
公毅然倡修煥然改觀行見井井翼翼視前更加  
閎麗是役也先是王侯肇修今爲朱侯重新兩侯  
皆西粵名杰也今能爲弟子員革故而鼎新易不  
云乎革之九五大人虎變其文炳也上六君子豹  
變其文蔚也然則侯之功盖可思已

五皇廟碑記

雲南提學 胡克開 邑人

按祭法能禦大災能捍大患有功德於民者祀之  
不則非此族也不在祀典爰稽搜神記五皇之名  
祀往代不同川中無不虔祀無不顯赫四季歸其  
耑轄而於春夏間神爲政更靈醮建禳火逐疫以  
集禧蓋六子嬪化二氣迭相終始神有耑司五皇  
蓋五行之精也天地之吏也先是縣左文武祠前  
地鞠爲茂草一望邱墟時伏奸人窺何晉興朱侯  
築墻百丈起左右銷銀房二十餘間建石坊一座  
木坊二座五皇殿樓飛甍丹雘壯麗令人瞻仰生

敬事神也實以培縣治也同時三義廟成刊象妥  
神闔縣士紳咸稱曰神如此事人可知卽今三年  
報最剡章首薦聖天子追厥自而錫之恩綸光前  
裕後崇躋巍臚侯不祈報神貺寧有旣耶或曰龍  
閣有皇祠矣復祠左者何余曰朱侯匪獨事神以  
培縣也太老父母品重璵璠種學積善每遺書誨  
侯和神人綏士女侯恰遵嚴令事神以安民侯匪  
獨忠于國且以廣孝也異日者繼侯而建節川南  
不見我侯一斑哉然則五皇之禦災捍患功德及

民祀典若增而光非卽侯之功之德垂不朽者耶  
余不揣不文謬爲記勒貞氓壽之邑乘焉

文星菴上殿佛前萬年燈序

彭

嚴

邑人

昔迦葉相傳實而非名之謂乃名之不存實亦焉  
附是山兩殿輝層盖以崇佛皈象文昌次第于前  
誠爲嗣祿所統或人之見心恒不及其奉神宗釋  
然焉知奉之崇之之非卽見之也易曰高其光足  
以照物而光之所止不若光之所衍夜者晦道也  
晝者昱義也而繼之以貞其象曰賁曰泰詩咏萬

年志祝也燈曰萬年非特祝之而已事有其舉必有其成各心所期遂得而並至福祥之說幾千倖惟致其所克致而不克致者致矣故以萬年始佛僅以萬年終而石詎以爲誕也茲一倡衆和爰序而勒焉盖以久其記云爾

修建城樓記

邑令 劉 琨

古人因地以建縣後人因制而完補垂訓守壯觀瞻二者相因爲用也有創無守何以昭來茲有制勿興何以資保障先後相需今古一致隆昌創始

隆昌縣志

卷三十六

記

四十七

於前明隆慶二年地形發源終南熊耳自北而來蜿蜒數千里至其地綿亘一山名曰雲頂然後轉折三五結爲縣治宛若蓮花縣署居蓮房左右環抱前後朝拱形勢儼然秀而明眞而正也舊設東南北門西方因地形不便故於西南設一門以當之合爲四門各建城樓週圍城垣悉包羅無遺是以先世科第人物蟬聯不已迨至張逆蹂躪城郭坵墟城樓灰燼在當日新建之縣治一旦傾爲瓦礫之場矣我

朝定鼎哀鴻爰集繼又吳藩變亂官斯土者無暇治之以至八十餘年城樓無柱礎之遺城垣多崩塌之處余於康熙丙申夏來令斯土目擊心傷有志修補而未逮十載以來各上憲廣示招徠人民雲集向之落落晨星者忽爲攘攘肩靡地矣此亦山川之靈時至勿遲之會乎乙巳春毅然舉事以遂初志鳩工命匠相與從事越兩載樓閣崢嶸城垣壁立憑虛一望百雉屏如四樓聳翠居民輻輳一逢場集之期惟聞薨薨振振矣噫嘻厥功成矣縣

隆昌縣志

卷三十六

記

四十

治可以壯觀已或曰樓也門也煥然一新不亦洋洋大觀也哉後之令斯邑者誠能缺者補之壞者修之庶億萬斯年而金湯鞏固矣是予之所厚望焉因以爲記

建祠修塔碑記

邑令

于中行

盖聞崇四術學校風厲之使人皆知乎學問心各返於性命篤實輝光而人文駸駸益上賁道所爲化成天下也若地靈所鍾山川秀麗之靈上應文

廢墜又清出寺之左右前後田畝山地歲收籽粒  
以爲飯僧供佛之資並應往來茶木之費因易其  
名爲普濟寺蓋欲人之顧名思義而後先承繼以  
普及於不朽云

宿精氣鬱勃傑士崛起其間經緯交錯煥一世之  
文明此天文也由前之說人所共睹由後之說微  
而罕測昔紫陽夫子善風鑑嘗與西山極論其聖  
言甚旨迂學弗達或曰爲太極河洛之蘊聖聖心  
法所在固未易爲渺見寡聞道哉然宇宙精粹之  
氣何地弗凝特造化之融結功難必全扶而培之  
半在人事古人控制山川裁成有法其亦觀乎天  
文而仰贊其義歟邑建自明隆慶二年山龍綿亘  
豐密江水由東環若帶滙西北小溪出傳爲金鵝

隆昌縣志

卷三十六

記

四十九

形故其下有金鵝洞從百丈懸崖滴落聲潺如鍾  
霧起光映彩霞遍野名朝霞洞坎有石印星應官  
貴直異景也其分龍自東而南忽折向西騰躍翔  
舞渡石峽頓起廻龍島鎮江心爲邑治捍門前任  
朱令建文昌祠於上與學宮遙對數十年名流輩出  
顯秩頻登明季兵燹後遺蹟僅存予官茲土志切  
廢滯一日閱洞石覽祠址望天峯樓窳左右層巒  
疊翠不惟氣槩軒昂壯色鉅觀砥柱江流渟蓄無洩  
文廟倍見崢嶸爰捐俸倡建商之紳士耆老翕然樂輸

勸事首正殿次魁星樓暨後殿飾繪輝煌舊塔已  
圯更新文峯特立正居文明方位經始二十三年  
冬落成於二十五年春工竣闔邑懽忙丐予言以  
記其事予惟天地之鍾靈也不聚則不發聚愈固  
則氣厚而抒彌閱

聖天子薰陶化洽海內同文邑人士沐文治之隆戶誦  
家絃彬彬有象地效厥靈天毓厥秀將英竒纍纍  
科甲蟬聯雲蒸霞蔚翊贊鴻休不拭目可俟歟  
梓潼帝柄文衡啟文明之運其有以默佑隆矣從來

隆昌縣志

卷三十六

記

五十

吉事有祥方祠新議裝像適龍市鄉人報有

帝金身置頽廟中因迎入斯祠靈威顯赫此非冥冥  
中蚤有定數哉夫

帝一十七世爲士大夫身隆德廣厚在詩曰張仲孝  
友然則

帝之德孝友其大端也先儒論德爲本文爲末故文  
教之敷先懋德隆人士敦孝篤友以植德基而復  
澤詩書禮樂之華何患其文弗炳蔚名弗顯揚耶  
是所望于多士之共相勗焉爾是爲記

建閣修學記

邑令 黃文理

義莫大乎尊王而道最隆於崇聖人生於三事之  
如一由來尙已方今

聖天子建中和之極興賢育才雅意作人俾含哺鼓腹  
之民無不涵濡德教以臻時雍之治普天率土躬  
逢

盛世醉飽太平沐浴光天之化其可忘所自耶縣治  
東祝國寺歷來

朝賀之所規模狹隘供

隆昌縣志

卷三十六 記

五十一

龍亭於佛殿中瞻仰無地非所以肅朝儀盡臣禮

天顏咫尺之謂何可不思宏共制哉余下車時卽有志  
而公務冗繁未之逮今事稍就緒而歲且屢豐爰  
集紳士會議修廟堂三間東西置兩廡外立大門  
一座以肅慶賀禮非直爲觀美也亦聊以伸臣民  
忠敬之微忱焉至學宮廟宇舊雖有歲修田租等  
頃資補葺之用而相沿荒蕪已久損壞實多春秋  
朔望不足光巨典而妥聖靈思並葺而新之門宇  
牆垣凡有關文風緊要處量作培補以仰體我

皇上重道崇儒光昭文治之至意敬捐俸廉爲士民率  
第工程浩繁所費不貲非一木之所能支諸生夙  
沐

朝廷之雅化得業詩書被服聖人之教忠孝之心敬  
□尊師之意咸油然而生遂能竭力以圖其新而鄉曲  
市鎮躬耕力田以及服賈牽車之氓亦莫不隨意  
出資以勸巨舉是役也肇工於癸未冬杪落成於  
甲申孟夏新建寺前臺閣則顏其額曰同慶修葺  
學宮紅墻則增石刻二額一曰數仞宮墻一曰萬

隆昌縣志

卷三十六

記

五十二

世綱常俾典禮輝煌文宰炳蔚齊一邑之力以隆  
百世之軌其有關

國體民風匪淺鮮矣隆人士丐予言以勒諸石予嘉  
其向上慕義趨事赴功之誠爰合兩事而爲之記

三進士墓記

邑令

黃文理

邑之西南隅距城十餘里有扈家巖俗傳巖下有  
扈黃胡三進士墓而莫知共名甲申春邑人有爲  
虞芮之質者余往勘焉至涂家場望懸巖壁立山  
色葱蘢從人爲予言曰巖下壘壘三塚羅列於荒

烟蔓草間者卽所謂扈黃胡三進士墓也遂減從  
徒步往觀之三墓宛然華表零星碑石縱橫五六  
尺拭而讀之僅得其姓餘皆剝蝕莫辨歸以其事  
述之友人僉曰公修纂邑乘搜羅往蹟此三賢者  
或可賴以傳焉余曰志所以傳信而垂諸久遠三  
人之墓雖在然未考其名諱不識其里居耀質何  
代潛靈何時以及人品之高下功名之顯晦皆不  
可考第以其姓氏科甲窀穸崖麓囟圖梨棗不猶  
是稗官野史之所記載乎誰其信之友人曰天下

事有曠世而相感通者依古以來名公鉅卿文章  
德業固代有傳人而世遠年湮豈無淪沒而未盡  
表章者哉夫三人既能取科名捷南宮則文學詞  
章在當時必有可觀况乎佳城鬱鬱華表峩峩居  
然宦塚三人似又不徒以進士終者耳表而出之  
是亦闡幽抉微之一端也如必按舊冊而稽之執  
遺編而考之則長林豐草間幾何不抱恨泉壤爲  
山靈所竊笑耶爰敘列其姓氏塚墓而志之嗟乎  
隆邑自明季兵燹後學士大夫故家舊族流離播

遷三墓而外如南關之石坟數砌咸稱爲明進士  
李人儀祖墓而其名亦不著蔡冢舖高塚一座在  
陳廖二山之間則并其姓氏無之他若余足跡所  
未到之處諸如此類又不知凡幾也可勝慨哉故  
並誌之以俟考古君子

閒臺記

陝以成

臺以閒名因余閒而閒之也蓋余自弱冠涉乎知  
非之年辛勤帷下困頓場屋形馳魄走志苦神勞  
數十年幾片刻之不閒矣迄於今景暮桑榆終老

明經意念絕乎榮寵思慮不及子孫將欲挈巢父  
拉許由跡山阿椽雲壑作幽閒餘日想爰築臺於  
山之麓結構亭亭形如碗覆設綦子之淨几架顏  
闔之邃廬肖米顛之陸舫製蔡邕之焦桐寶鼎棋  
枰茶鐺酒灶之類無不合形輔勢雜陳於臺之上  
以佐余之閒玩而暢余之閒情也而且山之高溪  
之流泉之鳴雲之浮竒葩異卉悅鳥時禽如摩詰  
輞川別墅有孟城坳華子岡鹿柴歌湖之勝歷歷  
環列於臺下以供余之閒眺而助余之閒吟也噫

天下事必位置之得宜而後創建命名之間適如其人以出之而人亦不得強以相同也不然將使功名之士棄其建豎勲業之事捐乃青燈農工商賈舍其錢鏹而忘其貨財欲偷閒逸志於此臺以與我共遊乎無懷葛天之宇也斯亦萬萬不可必得之數矣是知天地故闢此境故設此山林川澤之秀以俟吾之臺成而終此墓年之娛耳故曰臺之名因余之閒而閒之也

重修學宮碑記

教諭 鄧文端 夾江

隆昌縣志

卷三十六 記

五十五

邑之

先師廟在城西南隅縣署之右學署之左翠柏森森巍然中處其氣秀其勢雄得地之靈惟此爲最考其殿廡門墻肇修于有明粵西王公繼修於

國朝滇南劉公歷年來邑宰諸君子亦多補葺然新其故已耳未嘗一大其規模今邑宰黃侯楚之名才隆之慈父母也其治隆也敏而有方興利除弊勸農課桑無不釐然而于學校更留意夫學校莫重於學宮學宮者政教之本人才之源也學宮不

修則人才不出侯與邑人士謀而新大之宮室門  
墻若何而壯麗若何而崇高目營手畫指授無不  
如法隆之士奉侯之命體侯之心鳩工庀材晨夜  
展力于宮殿門墻之狹隘卑下者棟楹樑桷板檻  
之黑腐撓折者蓋瓦級甃之破缺者赤白之漫漶  
不鮮者一一如侯意而營治之壯偉閎燿規模頓  
改丹漆黝堊煥然一新侯之德普侯之功茂矣余  
秉鐸茲土于學不能有所裨益觀侯之功慕侯之  
德願隆之人士爭相勸勉道德明秀駸駸乎人才

隆昌縣志

卷三十六

記

五十六

之蔚起者上不負

聖天子作人之雅化下可副賢父母培養之至意焉是  
予之望也故于其工之竣也刻辭于石立諸其廡  
以爲隆之人士勸

拙軒記

黃文理

曩讀濂溪先生拙賦有曰巧者言拙者默巧者勞  
拙者逸巧者賊拙者德巧者凶拙者吉嗚呼天下  
拙形政徹上安下靜風清弊絕先正名言佩服勿  
緩久矣余治隆以來三年於茲事無巨細惟本樸

拙以錯諸實不敢巧僞而涉於虛兢兢業業思惟  
勤以補之以上報

聖恩憲德於萬一已耳歲癸未秋偶擴署東隙地構屋  
數楹落成後適友人以拙賦贈予予亦曰巧非所  
取也卽以名吾軒爰掇數語於額以記其實云

達海寺萬年燈記

吳橋令

彭

滉文瀾  
邑人

達海非海也而可至於海韓昌黎曰養其根而涖  
其實加其膏而希其光又曰航斷港絕潢以求至  
於海是二說也予竊取其一概之焉是山爲吾鄉

隆昌縣志

卷三十六

記

五十七

福地舊無天燈鄉人乞民間銖累寸鳩得金十兩  
有竒爰以本生息爲每年膏火之資植燈樹於山  
門美其名曰萬年而問記於予以期不朽予惟事  
之一成而不朽者必其先用力也勤刻意也專不  
肯苟成不求速效乃能以小置大難致易以近卜  
遠而其所爲無不如其志非獨其說之足以動人  
其中亦有智然也衆姓之舉其智未必卽能周到  
於萬年之久而其事已成必得一大無良者乃足  
以壞之則此事之能萬年與否亦無庸預筮而志

不朽而速朽猶夫學海而不至於海夫自有職其咎者予固樂爲之書以紀其事云爾

樓峯寺記

杜 梁邑貢

縣西南三里許有山壁立聳出重霄名曰樓峰頂平而濶建佛寺於其上至明盛時殿宇鱗列緇流數百鐘鼓聲徹於霄漢宗風大闡於蜀南士大夫登眺必於是焉昔昇菴先生有曰半天開佛閣平地見人家前明邑宰朱公治隆云名山著佛光是色是空遙見燈從雲裏露寶寺鳴笳樂非聲非寂

隆昌縣志

卷三十六 記

五十八

忽聞鐸自望中傳觀二公之言山之高地之秀形勢之美實與峨嵋並峙爲吾邑名勝第一巨觀也慨自世局滄桑梵宇之輝煌鞠爲茂草金爐之螭火散作荒烟雖正殿之龍象猶存而兔跡狐踪令人今昔興廢之感者久之自

本朝定鼎以來休養生聚居民漸集地運聿興有僧明禪披荆剪棘慨爲住持衆亦樂爲修理各相喜捨正殿補葺前殿創興兩廊脩舉山門重振焚香炳炬開不夜之光暮鼓晨鐘徹聲聞之響朔望相

與瞻仰象教樂善皈心樓峰古剝煥然一新不誠  
勝事哉方與昔人題詠有合也弁此數言於碑之  
端凡有事厥功者例得脩書

高巖山記

學正

王夢桂

邑人

邑之東有高巖山自滎昌蜿蜒百里而來其下有  
溪徑盤旋羣峰環向頗有山水之趣予愛是山構  
宅山下嘗與客遊賞其間或獨坐微吟雖未敢云  
登高之呼而衆山之響應如予和焉因俯而思高  
巖之名不誣也然予之意更有寄焉祥州之地近

隆昌縣志

卷三十六

記

五十九

城郭者多坦平乃此山竟超然聳翠挺焉崢嶸當  
其野芳秀發佳木陰繁風霜高潔水落石出四時  
之景物不同而四野之習俗又可凭臨遙矚而枚  
舉之見綠野平疇築場納稼則東作西成之景也  
螢火燦爛書聲呶呶則比戶絃歌之象也至於工  
商絡繹負歌於塗行休於樹偃僂提携而往來不  
絕者寧非懋遷有無通功易事之風軌乎卽一方  
而推之一國卽一國而推之天下所謂不識不知順  
帝之則無不可作如是觀焉因掇數語以記之

重建蓮峯書院碑記

邑令 盛世綺

邑舊有金鷲書院爲前任畫壯公所建不數年改爲郵舍山長講席移諸明倫堂堂之後有文昌祠暨東西兩廊肄業諸生共棲於此人神雜處固非所以妥神靈亦非所以宏樂育也且山長脩脯僅收穀四十餘石而諸生無膏火勢不得不廣資以示鼓勵爰設學田增膏火移正齋學署於明倫堂後以學署地建書院相其體式第一座爲

文昌祠次居山長再次講堂再次奎閣突几崢嶸與

隆昌縣志

卷三十六

記

六十

文昌祠相應接外列門二重前後傍舍共四十楹繚以垣墉器具咸備所費不下數千金除損廉外皆士民所樂輸者命紳士郭元龍余千等董其事創始於仲秋落成於季冬因其地與縣署共枕蓮峯也顏其額曰蓮峯書院清穆間厰環林縈映四圍層巒疊嶂無不含輝絢綵以奔赴於前邑父老聚觀者莫不欣賞以爲吾邑得此勝地以之事神則神無不福以之爲學則學無不成此數十年來人人所欲爲而不得者今得巍然在望使非

文昌帝君欲啟文明之運有以默相之焉克致此  
予惟是役也當余甫下車卽有志於此因軍興不  
果鬱鬱於懷者三年矣今幸妖氛肅清年登大有  
始得遙觀厥成興廢舉墜之難若此邑人士鑑予  
苦心由此更加振作不獨祀典日隆行見祁祁生  
徒歲得名師爲模範坐春風而沐化雨端心源而  
正學術處爲良士出爲良臣將金鷲於以生色石  
洞於以增光是則予之所深望者耳因記顛末勒  
諸石以爲券

隆昌縣志

卷三十六

記

六十一

重修隆昌縣城碑記

邑令

盛世綺

邑之有城所以禁暴衛民也前人創之後人因之  
無俾城壞乃足以肅觀瞻而垂久遠隆邑城垣閱  
舊志創自前明隆慶年間兵燹後僅存遺趾至我  
朝康熙六年邑令大年祝公始克重建百餘年來官  
斯土者雖時加補葺而河水浸灌風雨飄搖不獨  
女牆盡歸頽壞卽城身之裂縫發鼓勢將傾圮而  
危如累卵者蓋十有八九矣予於嘉慶戊午秋來  
涖茲工有志補修因軍興不果庚申春邪匪逼近

鄰邑羽檄雲飛人心惶惑徙家於城者不啻數萬計無復之不得已暫用竹篋貯土壘砌以資保障幸邪氛遠遁得保無虞然任其傾圮究非防衛之道爰啓上臺設法新修裁協濟渠邑站夫之需以資工費命紳士李學淵余昂等董其事親爲指示摘段折修共計城身六百一十丈凡參差不齊者俱易之增設堞口一千五百三十座高二丈二尺海漫內牆門樓捲洞無不煥然巍然以壯一邑之勝門四東曰觀光南曰解愠西因地形不便於西

南設一門曰聚奎北曰拱極經始於嘉慶庚申仲春越辛酉冬落成或謂興作之難也往往公旬無度輿皂持片紙挾赤字叫囂乎東西隳突乎南北譁然而駭魂夢皆驚今百堵皆興而野無追呼戶胥安枕者未卜操何道而能致此予曰天下事善創不如善因因所利而利之擇可勞而勞之非當其事者不知知其事者無不交相悅服是則斯役之不擾於民而實大有益於民也於是乎書

修水城樓記

耿光祐

狂寇披猖之際偪臨城下人情恟恟令尹偕諸子著戎服提寶刀督千夫登城守陴金戈森前玉韞環後鐵鎗銅礮如電掣如雷轟聲光滿天四野咸震如是者數晝夜不絕今而後入郭之寇我隆人其免是哉而回視城中居民爭汲者踵相告曰今水且竭可奈何夫修綆不能汲環城之溪極目不能望隔歲之梅仰觀於天天不作雲俯察於地地無湧泉雖復淘掘新舊之井開鑿方員之池而用

隆昌縣志

卷三十六

記

又六十二

多則竭日久則涸夫豈其坐而待彼諸君子乃言於令尹曰吾儕淺陋向不及此今若於東門外增附子城深鑿其下瀦爲水區然後穴通溪流以資引注則何如令尹曰善於是鳩匠督工上築下浚而以兵勇環火攻衛之賊時往來無能爲厲凡三閱月厥功告成又復因城建樓排棟列宇以爲廣儲軍資遠偵賊勢之所然則仰承俯注窮高極深旣弭患於乘闖亦無憂於涸轍坐是安堵其復何恐而况景平有日攬勝登樓東挹巴渝南招羌詔

西通佛藏北達皇州都成筆下之烟雲快助樓間  
之風月是水城者將易爲騷壇健將旗鼓縱橫之  
地矣復何狂寇之足云

養濟院碑記

邑令張聘三莘山

竊維孤貧無告恫瘝堪憐鰥寡靡依惠懷宜急是以王政之行不嗟流離於鴻雁卹矜爲務豈賦萇楚之阿那方今我

皇上重熙累洽澤遍窮簷院名養濟仰見體恤之深仁用列報銷特著哀矜之殊典凡在覆幬之倫盡承休息而此孤貧之侶尤荷鴻慈余庚午仲春蒞任斯土查閱各卷獨養濟院一條缺如疑自兵火之後遺失無存及詢諸紳耆未能確爲指實第傳孤

隆昌縣志

卷三十六

記

六十三

貧原無額設名數亦無給發欸項惟於縣屬舊有公項內按照在院人數年底酌撥分發計每名終歲所得不足贍其饗殮殊堪浩歎查院之舊基在北關外房僅二間屋宇湫隘亦復半即傾圮爰購院右側毗連房基一所鳩工庀材聯絡榮建共得二十間院墻門壁均爲隔別以分男女惟是宅身有所糊口無資則不嗟露宿旋悲枵腹矣因爲之捐金承當田產招佃完租以資其衣食所有房產契約粘卷備查其租穀並從前舊發公項概行歸

官經理按月給發並立收支檔冊列人流交以便考稽夫父母斯民原宜時存軫念豈孤貧在望反竟漠不關心茲持首倡捐廉復獲紳耆輸助董尉惠斌董率其事今院落成而收養碑勒誌以永垂後之君子倍加籌益爲幸是爲記

重修文廟碑記

邑人郭書

周書武王曰天降下民作之君作之師合君師之道而言之者也晉語欒共子曰民生於三事之一師教之君食之分君師之道而言之者也師道

隆昌縣志

卷三十六

記

六十四

之尊與君道并故古者建國君民立學爲先凡學春官釋奠先師秋冬如之重師道也爲一世師爲百王師已不恒有矧其爲萬世師者爲士林師爲卿相師已不可褻况其爲帝王者自

尼山啟聖師道獨隆千古漢唐以來或立學或建廟名稱不一要皆以崇德報功春秋致祭不數不疏典至重也

國初學宮稱文廟以武廟配至嘉慶五年以

夫子之道萬代絕尊爰易文廟之舊號特加

聖廟之休稱而文武二廟則以

二帝主之猗歟休哉尊師之典亘古以來未之有也

### 溯隆邑

聖廟剏自前明

國朝康熙五十八年重修之距今已近百年室久則  
敝物理之常中間非無補葺者而大致不可支矣  
邑侯劉明府下車未久召諸紳耆而語之曰

聖廟不可不重修也聞前任盛侯與衆紳耆議興此舉

隆昌縣志

卷三十六 記

六十五

以憂去而不果余不敏願與合邑成之紳耆皆同  
聲應曰此士民之願也但鼎新之舉與補葺異况  
物價工費較倍昔時勸輸之說不可行也非均攤  
糧戶出貲襄事不可侯許之爰且稟請示且詳明  
立案於是士民踴躍諏吉興工衆謀僉同五材並  
飭拓

崇聖之祠溯明德之發祥於殷宋魯廣大成之殿欽  
至誼之拔萃於清任和賢士醇儒闡微言以立言  
則堂構俱壯鄉賢名宦同德懋而功懋亦棟宇維

新欽忠孝之品爰廣厥居仰節義之靈俾安其宅  
治泮水及長橋咸期先登彼岸闢賢關與聖域庶  
免不得其門凡規模宏敞材質堅凝丹漆交輝黝  
堊并煥經始於癸酉孟冬歲事於乙亥季夏計時  
凡閱月二十計費約萬緡有奇是役也官師主之  
士民從之廟成觀者咸曰宗廟之美宮牆之高洵  
足以光尊師之典而慰士民報德之忱於無疆也  
侯曰是不可不誌也遂記之

繼香銘

隆昌縣志

卷三十六

銘

六十二

繼香銘者銘吾友蜀人劉晉仲之婦尹氏之墓也  
氏諱忽蘭叙州府宜賓縣人大參尹子求先生之  
女也記己酉予以喪子狂走白門先生爲南職方  
郎嘗爲余言其婿劉郎七歲能詩劉郎者給諫勿  
所公仲子即今所稱劉晉仲者是也安知其有女  
慧如是然其時猶然女兒習玩不知書既歸晉仲  
晉仲妹文玉詞翰妙敏心悅而好之相與爲友始  
讀書稍稍爲詩精神起落常出人意外佳處不必  
由思思者反是無關係處久之從晉仲省尊公於

燕由江入峽由峽入淮由淮達運河竹樹逢迎煙  
日爭讓舟行遲緩可以爲家得一意爲詩其篇時  
全時缺缺則聽之缺於此或全於彼有絃摧柱折  
援他琴以續之之意予讀其詩骨散神寒音節清  
巉如病葉偶然從風而墜或中搯之附枝翅鳴不  
能自致於地如暗泉之隄於石而不能自竟其響  
此斷香之旨也至燕亦有詩全缺如之久之意忽  
忽無主有秋冬氣晉仲憂之曰我亦不知至是亦  
不甚作詩作亦不以示人晉仲檢其枕中所藏如

其全與缺而存之頃之卒年甫十九鍾子白世所  
不常有者才人所不可無者友才而爲我友友而  
爲我婦婦而才相當晉仲以爲能永乎不能永乎  
銘曰丈夫才而鬼瞰之矧其在女子之窮也好友  
在四方而造物或收之矧其在閨閣之中也劉子  
者憐才乎求友乎悼亾乎將尋香於落葉暗泉之  
間乎噫

彭汝敬墓誌銘

御史 王命來 邑人

汝敬名惕姓彭氏先世楚黃人明洪武初年入蜀  
家於敘州之隆昌傳十餘世矣四世祖壽昌以舉  
人官江右多宦蹟祖名世爲邑諸生事親以孝聞  
孝行紀通志崇祀鄉賢有日矣封朝列大夫妣徐傳  
氏封恭人以子貴也予同年友威崖公諱嚴者汝  
敬考也崇禎舉人任貴州思南府同知官聲清簡  
明季國步多艱朝廷日以成獻二賊爲事故時官  
多掩抑焉恭人黃氏生子二長卽汝敬懌字汝康

隆昌縣志

卷三十六

銘

六十八

其季也嗟夫予同代巡粵東已而世界滄桑土崩  
瓦解無所容歸迨

本朝定鼎電掃妖祲乃復我邗族一時交遊故舊半作  
古人卽求故人子弟亦不可多得矣孰意予墓木  
已拱殘喘猶留今乃親見吾汝敬之死而爲之銘  
也嗚呼可傷也已汝敬前以歲薦貢任貴州銅仁  
府推官

國朝初當事復辟爲資陽資縣二學司訓爲人尙氣節  
好施與兵燹後鄉鄰戚族爲汝敬提挈復業成家

者甚衆又率奴僕斂獻賊所屠骸骨於黔峯山巔  
壘坟二塚嘆曰周文王澤及枯骨范文正公義滿  
鄉鄰我輩不當如是耶每以勢微力薄不能稱其  
志氣而卒得年四十二子瑄珣俱幼女二人未行  
妻陳氏叔慎莊壹將以庚戌冬塋汝敬於本鄉之  
龍馬漕而汝康以世誼屬予銘之銘曰龍馬牛眠  
汝敬斯藏既藏既固世世隆昌

郭南岡墓誌銘

學政 何裕承

公諱元龍號南岡歷任貴州玉屏印江縣知縣郭君玉瑩之太翁也先世籍楚前明遷蜀隸隆昌縣高祖之特嗣高祖之範明天啟丁卯科舉人由湖廣永興縣知縣薦升運糧道曾祖再新邑庠生  
貶贈修職郎祖儀歲貢生蓬州訓導崇祀鄉賢父錫麟  
雍正乙卯科武舉貴州荔波營千總子二長卽公公生而倜儻落落有大志然敦厚周慎動中禮法  
尉興國州時年甫弱冠佐治勤敏有范孟博岑公

隆昌縣志

卷三十六

銘

七十

孝風值滇南用兵征調將卒旁午於道上游悉公廉幹檄辦襄陽郵政指麾凌厲民忘其勞旋以憂去官服闋銓直隸安州尉辭不就蓋公旣無伯叔終鮮兄弟初因太翁期望甚殷勉就一官非其志也夫才力明敏者氣多不靜性情恬淡者事每不舉公具文通武達之才急流勇退視躁進而貪戀者殊矣致仕家居敬宗收族恢廓祠宇廣置祭由義塚廢者舉無者興無一不自隗始自奉甚約而輕財好義能急人之急族中舊有節孝坊歲久傾

圯公捐貲易以石用勸艱貞貧乏不能自存者則全活之能讀書取科第者則培植之凡鄰里戚黨有求於公皆各得其欲以去嘉慶丙寅歲饑公捐賑米數百石爲一邑倡有司上其事督憲以惠敷桑梓旌其門此又其卹惠之較著者也夫以公之才之德歷敷顯秩風示鄉國當無媿色無如限於資格屈在下吏才浮於位不竟其用然公有才而不欲以才見其修德也自適己事而已豈計較乎是哉况隆邑望族首推公家自明初迄今擢顯第

腰紫綬以後先輝映公才旣未大展而又德積厥躬其食報之厚將在其子孫是固理之可信者也銘曰人爭榮名公則知止人競營私公惟增恥仁粟義漿施及桑梓有德斯馨湘蘭沅芷松柏閱時方茂柯枝卜公之後罄無不宜其天定也何說之辭貢腴未敢郭有道碑

雜興 三首

劉時俊

大江催日夜烈士激中腸  
長嘯結飛颺氣欲吞八荒  
驅車出門去効命爭戰場  
左手發烏號右手揮步光  
殺氣凝不流黃塵蔽日揚  
名當輝竹帛義爲萬世倡  
笑謝蓬門者我豈自摧藏  
宿雨鳴不歇脩霑滴空堦  
蓬蒿日以積鬢毛日以摧  
感此令人悲出戶仍徘徊  
矯首望白帝暮雲鬱不開  
安得乘長風萬里破陰霾

春風何習習桃李獻其妍  
棲息文羽禽容色互相

隆昌縣志

卷三十六 詩

一

鮮豈不甚榮艷其如四序遷  
商飈一夕披枯幹曳蒼煙  
棄置勿須道嚴霜但自保

別詩

劉時俊

浮雲起天末白日何荒荒  
置酒臨高臺悲風逐我翔  
念我飄零客與子暫相將  
子去我且留慷慨激中腸  
去亦不成歸留亦等故鄉  
遠近各一身世路正悠茫  
請爲別鶴吟四座慘無光  
願言共努力日月遙相望

山水吟

黃文理

平生愛山水隨處護松竹豈必戀泉石何須寤歌  
獨一坵一壑間綈懷願似宿山巔與水湄行吟風  
清穆彳亍篔簹園每覺林香馥漱流浣塵襟枕石  
甘雌伏少小懷國恩壯歲沾微祿薄宦二十年  
井養爻占六每逢隙地餘栽植疇童僕韋布值冠  
裳欄干仍苜蓿况復性情偏菜根勝食肉以此歷  
楚豫更領川南牧綰綬到祥州土瘠氣清淑四時  
雨澤盈滋黍稷麥菽婦子顧之喜老幼供饘粥催  
科頗不勞無事工鞭扑所愧撫字心賣劍而買犢

隆昌縣志

卷三十六

詩

二

偶爾鼠雀嫌迅掃清案牘稍暇郎扯朋偷閒步林  
麓林麓殊匪遙官衙傍喬木金鵝峯頂峙一覽衆  
山臺幽樹繞池塘四時花簇簇古砌滿芳菲更多  
陶潛菊嫩蘂清露繁虬枝巢鸚鵡赤壁羨東坡瀟  
皖懷山谷何時賦遂初按圖修我屋結構兩三椽  
好架書萬軸

東嶽廟

朱雲駿

磴曲盤空壁松圓臨古廊穆如偈象緯俯視成微  
茫雲嶠帶晴色溪風吹稻香何當遂初服丹井納

新涼

雪後登樓峯寺

朱雲駿

巉巖斧劈成朔風吹雪立琳宮八杳冥帝座通呼  
吸深箐莽四圍輕冰融半濕菜花黃滿畦霜葉紅  
映笠僧樵雲外歸鳥語林間澁支筇下層岡仰睇  
眩百級

縣齋書事

朱雲駿

不材任劇邑四郡交一隅冠蓋日紛錯電掣郵亭  
符役夫動千指怒馬飛長途前令大窘迫里役疲

隆昌縣志

卷三十六 詩

三

供輸令來未匝月衆謂令樸愚具陳里役苦宜何  
如改圖令聞起太息秕政當立除家口尙少累俸  
錢無多需此役令獨任父老母嗟吁厨傳幸粗備  
白飯兼青芻使者肯見容涉境郎安驅向來奔走  
徒努力事畊鋤上愧何易于民困亦稍蘇作詩告  
來哲鄙意慎勿渝

署後小圃

朱雲駿

雨露思不私植立膺厚眷荒畦八九弓蕪穢不忍  
看王君適館我頓喜開芳甸經營及瓜豆培護到

藜莧綠筠影寒碧紅蕉神婉變雜卉並向榮一一  
足忻羨俗人別妍媸慧眼平貴賤但令舍生機匪  
假自矜銜所患廢不治天闕色香變墻外有壽樗  
煙翠落深院禽言聽綿蠻蝶舞想依戀編籬數株  
斜抱甕一隅便臨風裊清芬對景諧權讌先生墊  
角巾童子歌團扇琅然如玉琴書聲誦百徧此中  
樂有餘分外息交戰隙地亦盡心庶勿等郵傳  
冬夜宿雲龍寺

朱雲駿

巖飈捲地寒侵膚淫潦浹旬泥沒塗籃輿向晚畏

隆昌縣志

卷三十六

詩

四

顛躓芻藁縛炬空模糊僧掩柴扉足幽適馬嘶林  
樾破荒寂一登寶筏悟迷津何代禪師初卓錫白  
衣仙人最上坐楊柳春風說無我劇憐塵垢塞眞  
源且向瓦鐺焙活火細雨飄蕭竹葉鳴孤燈黯澹  
鐘聲清出山齒髮自尋省回首煙雲無限情

題石笑齋東巖遺跡兼贈曾笑齋 劉時俊

石笑齋朱嘉祐時人也里居名位不傳跡所自  
號倘亦翩翩士耶先是瀘江東岸有九德九思  
兩石刻久瘞沒無傳矣其月日東巖土崩石刻

忽出筆力遒勁點畫不磨後係年月及號則嘉  
祐時笑齋手跡也曾氏上夫欣欣願附之因舍  
故號亦號笑齋且自託爲後身云索余言以贈  
落落乾坤烏兔走星珠亂綴燭龍吼煙塵何處是  
神州萬古蒼茫一回首槐檀大戰億千場枉殺英  
雄浪自忙賈生大息阮生哭那知歧路俱亡羊宋  
家舊有亡機客茅齋知傍清溪石萬古悠悠付大  
釣一笑風輕四山碧何年去向閭闔殿玉女壺前  
看紫電留得雄書峭石邊埋沒無端今又見却憶

當年染翰時掀鬚濡筆信揮之縱橫灑落乍停手  
指向旁人一解頤披煙籠霧蒼苔古波翻石動虬  
螭舞疎林竟日自蕭蕭大似先生笑聲吐曾君丰  
韻亦悠哉道是先生去却回君不見樹穴探瓊羊  
叔子等閑何事苦相猜世代從來多草草一度相  
看一絕倒豪傑有時翻自嗤三生怎似無生好山  
自蒼蒼水自悠古人遺跡今人遊自非識破夢中  
夢一笑那禁萬重愁儂家慣作狂生態也還咄咄  
書無奈從今掩却天問篇憑君一笑江天外

苦風行

劉泌

北來道上苦多風，車馬盡日沙雨中。南來又復苦風惡，一日行程三日泊。天公喜怒本無私，所遇偏非威霽時。聞道長安花信急，相催不惜封姨力。聞道花開不用催，江頭有柳命將頹。

夢亡夫

朱懷瓊

劉泌妻

靈燈悄悄明，虛壁零丁。母子相對泣，颯颯寒風透。敝廬回憶生，平腸寸裂。英雄迴首任逍遙，孽身鬱鬱情愁迭。空房冷落難自慰，形影彷彿生胸臆。萬

隆昌縣志

卷三十六

詩

六

恨千愁欲控君，恍然驚悟已隔世。生平亦以聚爲歡，魂返清虛何太遽。柔腸淒斷難自陳，兩恨悠悠隔幽冥。

聞邊警

上將臨東北，狂彘且暮晨。腥風搖赤羽，落日暗青燐。橫海成何事，犁庭合有人。怒來三繫劍，忘却佩儒紳。

平望驛恭謁先君生祠

四首

劉泌

遙望我心惻，慈顏行且親。瞻祠惟有象，隕涕欲無

身燈火懷遺澤精魂翼舊民祇茲塘上路已足想  
辛勤

四載松陵治垂留芳至今苦跡歷可想遊子忍爲  
心生事家人怨遺蹤父老欽神明應聚此慘淡立  
江陰

心手經營地生平極不忘去久長相憶深情如故  
鄉典型垂士吏牲璧代蒸嘗慚恨負薪子箕裘懷  
暗傷

猶憶庚辰歲相從來此過入門相顧畏撫景動悲

隆昌縣志

卷三十六 詩

七

歌雅志未酌一遊魂之恨多英雄猶有淚風木慟  
如何

鵞洞留別

王贊化

臨別金鵞洞清幽不可名一灣波蕩漾四壁石崢  
嶸坐絕纖塵跡耳聞瀑布聲何年重過此再叙水  
山盟

春日偕鄧希直廣文同游樓峯寺 朱雲駿

晴朗宜人日聯鑣指上方陰崖圍古柏禪榻傍新  
篁雲影憑闌靜春泉瀾茗香徘徊聽仙梵斜照萬

峯蒼

重游雲龍寺

朱雲駿

憶昔游初地經今閱兩年老僧空宿草薄宦已華顛  
蟋蟀荒園雨蒹葭別浦煙撫時兼感舊一一付安禪

三台石

黃文理

危石列三台崢嶸北障來星辰齊拱衛雲漢共昭回  
懸磴千山俯凝眸萬壑開高吟聯謝屐臨眺獨徘徊

隆昌縣志

卷三十六 詩

八

土坎重關

姜懋勳

障據東南險重關帶礪宏巉巖天削就夾道地生成  
山勢雄城堞門闌勝甲兵金湯千載固驛路慶清平

正覺曉鐘

鄧文端

古剎名山著悠然啟大鏞洪聲驚萬戶清響度千峯  
高閣凌霄出餘音應谷重林間香氣滿雲霧隱仙跡

鷺洞飛泉

唐德一

一派從東下水簾注石開驚湍飛玉屑落澗泛珠  
洄古字苔封壁澄潭響似雷金鷲傳舊跡雲窟擬  
蓬萊

樓峯晚眺

晏恒

不少名山景攜壺趨此遊峯高天籟發嵯澗鳥聲  
幽淡几穿林末微風裊樹頭靜觀真自得乘興倚  
南樓

隆橋夜月

劉騰龍

坐玩隆橋月晶瑩澈水瀆碎金篩岸柳團鏡浴風

隆昌縣志

卷三十六

詩

九

紋魚陣驚虹影沙明失鷺羣樓頭誰弄笛清響隔  
江聞

樓峯登眺

徐昶

突兀凌雲起祥州第一峯曉煙籠翠竹薄霧裊蒼  
松霞照仙梵現苔深石磴封望中無限景青繞萬  
千重

早朝

劉時俊

巖城漏徹曙光瞳柳色參差御苑東曉霧乍澄金  
掌麗天門初闕玉階崇振振鷺序依仙仗隱隱龍

文護禁宮自是宸居天北極微臣何以効孤忠

江邊獨嘆

劉時俊

自嘆生涯計太疎於今懷抱復何如慣從燕市揮  
長鋏懶向侯門曳大裾八夜故人窓外月終身長  
物枕邊書漢家欲下掄才詔爲問誰人賦子虛

北伐

明史永樂阿魯  
臺入寇上親征

郭廉

萬乘躬行討不庭朔方從此淨無塵王功赫赫掀  
天地帝德巍巍動鬼神一統華夷皆被化萬方草  
木總回春小臣涓滴慚無補願效華封祝聖人

隆昌縣志

卷三十六

詩

十

和僧澄羽韻

朱雲駿

偶向晴臯踏亂山翛然初地碧雲間自慚厨傳紛  
徵逐何意詩僧暫往還水檻風來人澹岩雲根雨  
洗石孱顏橋邊徙倚情何限暇日香林許再攀

隆昌八景詩

道觀憑眺

黃文理

終南蟠結勢崢嶸入蜀臨江枕石城四塞雲封窺  
地脉三台星耿總天成登高極目滇黔迥望遠遙  
憐吳楚平形勝爭傳蓮出渚通衢驛路看花明

鄉校留徽

黃文理

嶽崎刻畫嶺雲邊  
丹字鴻文鎮巨川  
點畫縱橫符鳥篆  
形模隱現擬神鞭  
執書直向青旻表  
灑墨還驚碧水泉  
鄉校兩言存古道  
殘碑斷碣至今傳

樓峯聳翠

黃文理

一望樓峯只麼青  
層嵯疊嶂峙亭亭  
非煙非霧籠幽澗  
如露如濡漾遠汀  
石磴苔新山更裊  
松門日厚樹潛馨  
引鶯勝蝶情何限  
翠滴深潭染畫屏

響石遺音

黃文理

隆昌縣志

卷三十六

詩

十一

何處飛來石有聲  
仙盤鳥翼蒨知名  
扣桐謾說尋張史  
欵梓無勞訪鄭卿  
浮磬繫聞音嫋嫋  
鏞鐘發韻錚錚  
芳踪勝跡留千載  
文馬河西又穀城

迴龍砥柱

黃文理

凌雲插漢挺祥州  
紆折灣環曲岸頭  
兩水潏洄夾明鏡  
一峯鬱崛砥中流  
奎光凝紫晴薰閣  
塔影拖藍曉八樓  
吐納風雲陶萬彙  
清機活潑與天遊

正覺晴雲

黃文理

霽色輕籠正覺禪  
氤氳舒卷玉屏前  
開花不待芳

春日結彩偏多長夏天斷續隨風撐曉霧密疎臨  
水淡江煙無心出岫浮佳氣四望隨車百里妍

隆橋夜月

黃文理

郭外溪流跨彩虹漁梁光射蜀江東波澄玉兔銀  
蟾下煙淨寒潭晚浦中兩岸沙明澄皎潔一輪鏡  
擁望圓通試看白雪凝柔紙鼻屨遙臨憶謝公

鵞洞飛泉

黃文理

峭竒壁立洞橫開瀑布長懸天半來萬姓探源資  
窈窕千秋沛澤仰崔嵬銀河倒瀉形如練玉屑平

隆昌縣志

卷三十六

詩

十二

鋪響似雷滴滴清涼堪一掬如斯不舍共徘徊

閨怨

劉時俊

芳草斜陽獨倚樓閑調鸚鵡緩離愁羅衣久罷翩  
遷舞何事東風吹未休

梅花

尹紉蘭

劉泌妻

東風吹斷朝煙冷老幹窻前出瘦影輕羸玉骨霜  
前媚五出迎風粧不整

春曉

尹紉蘭

曉來孤岫淡拖光欲暗冰輪一半藏昨夜狂風花

落盡門前紅雨惹泥香

疎楓

朱懷瓊  
劉泌妻

秋水渾連岸疎楓向曉寒白雲侵樹影風起落紅殘

聖水靈鷲

郭其釗

小照臨江對日斜玲瓏古井徹泉沙尋源舊說通

幽路鼓角曾聽放晚衙

寺前一行穴相傳有人墜下忽開郎數十里許聞打

鼓呵堂聲乃返

犀灣縈帶

郭其釗

隆昌縣志

卷三十六 詩

十三

曲水如犀曲抱來一條玉帶鎖雲隈岸頭華表懸

雙劍

自注岸上

月魄明時照窈回

中巖雙節

郭其釗

土名聊葉灣按明末獻賊屠蜀里人諸生郭也

平也彥不屈賊死於此

光嶽千年正氣存中灘潭下弔雙魂欲向泊羅尋

往跡百尺巉巖是墓門

雩泉飛瀑

郭其釗

碧水奔來觸石灌千層雪浪走風雷霏霏滿眼隨

流去看是梅花不是梅

自汪開此題余向曾有渾是梅花開不盡句

白魚口觀瀑

即零泉

郭其釗

犀灣如帶水臨灘滾滾長流落  
急湍渾是梅花開  
不盡輞川圖畫一爲看

正覺山水歌

天地有奇氣融結爲山川  
山川毓英傑遂並古今  
傳維隆立治蜀之東  
山水奠麗自洪濛  
正覺玉屏當保障  
鶯江迤邐滙其宗  
中峯巖巖排雲起  
木宿冲天落澗底  
紺宮啟闢數百年  
高懸象教繁釋子

隆昌縣志

卷三十六

詩

十四

代有高流托山椒  
面壁禪機明厥指南  
岡突兀爭峯雄  
松蘿林樾揮鮮毗  
東嶺岑岑開丹嶂  
華表雙懸名閼壘  
字水瀼瀼漾錦波  
屈曲如虹映薜蘿  
青谿雨集吼巖瀑  
填填如雷瀉滂沱  
雲衢采徹楓林  
曉紫氣升騰羃靄  
多落日當樓  
篩倒影林禽下上  
鳴繁柯樓峯鼎立  
接天峯巒岢伯仲  
壓西東零泉瀑布  
落千丈朝霞采射  
騰長空大葛濛濛  
望中杳小葛青青  
一髻姣勾漏仙人  
去不回石床丹竈  
今何考岷山東別  
神禹導維江有沱  
流瀚灑漢安一

派過江陽極目凝睇一時了凡苾苾山擅名秀嶂  
嶺南來闢神鷲扶輿磅礴毓靈竒上合星躔應列  
宿君不見維嶽降神申甫功山兮水兮先後同的  
是巨靈神變化磊落英多乘長風蘇楊聲價重千  
古長此山川無盡窮

貞烈楊孺人傳

馬之騏

同門友聶元玉爲予談其里郭母楊孺人死節事甚烈屬余爲傳余讀其書而慟之涕橫集矣矧揚芳振徽載筆者奚庸辭孺人姓楊氏爲符卿衛玉先生仲女少穎慧端重母爲授孝經列女傳諸書輒能領悟已得呂叔簡所著閨範圍益研其大指丙申歸隆昌郭懋宏莊如賓友事翁若姑婦道甚飭歲己酉懋宏力學而羸遂病瘵孺人爲脫簪珥治醫藥徧走羣望病亟持其踵而訣曰修短命也

隆昌縣志

卷三十六

傳

十六

其奈若敖餒何孺人拊心長號將以身殉符卿公百計譬解之意始少解然已隱書絕命詞衣帶間矢靡他矣符卿公攜之歸盡謝膏沐坐臥一小樓梵唄聲琅琅徹簷楣間以爲常久之聞其姒舉二子私喜曰未亡人藉手以報夫子者其在此呱呱者乎請於翁姑王父立爲懋慈嗣名曰孝懿爲文告家廟大會諸親黨既成禮挈以省符卿公具告以故徘徊兩旬餘遂經而死端坐瞑目面色如生取其笥則遺書與符卿公暨諸姊妹若弟者各一

牘語懇而意暇衣裾袞舄罔不夙辦時丁巳五月二十二日也訃聞通國咸奔哭之縉紳三老列其事於學使者私諡貞烈郡邑親臨祭焉史氏曰夫生死之際亦難矣高談性命之儒或汶汶焉而矧是髻黛者流乎自昔彤管所紀慷慨引決以報所天已足昭閨儀而風薄俗就有遲回至九年之久必待如綫之緒克延既寒之骨不朽而從容畢命爲幃房之嬰杵者乎且上不難割顧復之恩下不必終襁負之愛而一惟同穴之盟是尋胡其定也

隆昌縣志

卷三十六

傳

十七

斯誠正氣之所獨鍾而爲亘古之所矧覩者哉醴生有源則符卿公之內訓從可卜已

書楊貞烈遺書後

董其昌

楊女郭節婦諡貞烈事具顧宗伯錢太史傳中斐而核矣無以有加已及讀節婦遺姊妹書有云爲讀書所誤慎勿讀書則自其乃翁尙寶公以及諸贈言者皆未下注脚使此意揭日月而行天幸余獨知其解敢惜厖贅語云求忠臣必於孝子之門予亦曰求烈婦必於孝女之室然而事勢有兩難

者若陵母之自刎趙苞之臨敵義有所重而情有  
所割也節婦之意日殉夫則不能事父修地下之  
諾則不能承膝下之權彼蓋鴻毛一死而昊天二  
人作此沉痛語耳不然其所爲捐軀立節者將以  
爲婦鵠豈不以厚望於骨月乃以稱誤哉昔者孔  
子嘗自稱誤矣曰罪我者其爲春秋乎使春秋果  
有罪則節婦之讀書果成誤也嗟乎三光五嶽之  
氣鍾於節婦而五經廿一史之書亦證於節婦無  
論腹笥萬卷如蔡文姬李易安輩面甲十重郎唐

之魏鄭國公朝之楊文貞勲業文章炳炳今古猶  
將慙避三舍書何誤於節婦哉稱節婦以三十六  
歲坳余謂心死爲真身死爲幻節婦自許郭郎一  
死之後已自無生九年之中日日皆死日也大抵  
驟死易待死難何則死生於情驟則激久則夷夷  
則悲心漸微而繼立之後又以鞠子教兒爲解故  
謂節婦三十六而坳者此數甲子語也實與郭郎  
同逝久矣兩史公既表節婦之烈余復闡其純孝  
之隱如以婦爲爲虛名世有以死博虛名者何人

哉時節婦之叔父宏聚司教吳中予爲言之如是  
宏聚曰九原可作必謂生我者父母知我者年家  
史公也

又詩

董其昌

悽憾分雙影徐圖報所天一心豎片鐵相見矢重  
泉大義從容就遺孤委曲全告成因繼絕忍死亦  
行權結綵猶悲晚留詩不愧前何云讀書誤千載  
楚詞傳

楊貞烈贊

張 鼎

隆昌縣志

卷三十六

傳

十九

男兒讀盡天下書貪生怖死將奚爲只緣義理太  
分別七尺計較徒區區百煉之鋼不繞指不見男  
兒見女子問渠何爲擲一死一死從容又如此婦  
死夫兮夫有子妾身一死尋常事妾心非願效古  
人妾心非願誇今人但妾所願妾死耳鴻毛泰山  
安足論吁嗟此心誰可比淡淡浮雲共止水世人  
常懷妾婦心死忠死直俱可矣

楊貞烈練銘

陳繼儒

蘇武塞上帛子陵桐江絲絞作頭中練之死終不

移堂堂男子空鬚眉郭家有婦知不知

又詩

陳繼儒

絕筆傳來欲斷腸一言一淚挾冰霜立孤六尺心存趙從死千秋節並姜含笑黃泉無愧色列名青史有餘芳錦江水膩何堪薦采得山薇自首陽

頌楊貞烈詩

姚士慎

爲婦依稀識嫁裳赤繩空繫百年筐盟心共穴冰猶骨瀝血從君鐵作腸明月夜哀餘草木清霜朝淚傍鴛鴦可憐辛苦孤兒後留得雙魂見歲嘗

隆昌縣志

卷三十六

傳

二十

頌楊貞烈詩

沈國華

石琢肝腸鐵鑄心忍將花月自銷沉一腔心血凝成碧九載青蓮化作金雷雨難收塵上影鬼神常泣帶中吟漫言嬰杵輝千古貞烈於今嗣好音

頌楊貞烈詩

陳啟運

藁砧聲斷向誰悲身繫綱常死不辭冰操獨盟天地老鐵心惟許鬼神知存孤一綫猶夫在絕命千言爲子詒中夜慈烏啼不絕晚看紅雨濕連枝

郭克廣傳

學使 王奕清

蜀之南有隱君子郭克廣者隆昌人也天性純孝嗜學博古行芳志潔余視學西川時已耳熟焉戊子春余試叙州其仲子增應本年歲薦長子圻季子垣俱食廩餼有文名越六年甲午余弟奕鴻典試川省其季子垣以葩經獲雋爲吾弟門下士乙未謁余於京邸持乃父行誼示余請曰垣以邊鄙豎儒幸側二公門下成我之恩與生我何異第垣父克廣三年見背尙未有傳非無可傳蓋欲得其

隆昌縣志

卷三十六

傳

二十一

人而後傳也今垣兄弟俱受知於公願得公一言以光家乘余取其狀閱之乃知公出汾陽七葉之裔明初有孟四者自楚麻城遷蜀再傳而爲御史廉又七世而至公公父忠懿以廩貢仕明季爲監紀別駕卒於官公母王孺人先一載卒公時年甫十二祖州判公老而多病又值明年戎馬生郊饑饉相仍家人僮僕胥散去公與祖及庶祖母相依爲命自黔反播居於洪江貧不能以贍祖晝負薪米夜橫經史揣摩文章必以左國漢唐諸大家

爲宗久之公之元配李孺人謂公曰功名猶可俟之異日而王父年老多病若不及今送還鄉里脫有不遑不幾與二親同抱終天之恫乎乃脫簪珥出粧貲以供路費送州判公回里未踰年州判公卒公以冢孫承重扶柩葬於副使公墓畔哀毀踰禮服闋應試試輒冠軍膺歲薦隱居教授富隆瀘三邑登賢書舉明經食廩餼者多出其門郎余視學西川時列高等者皆其弟子也公宏獎士類不嗜財利故孤寒子弟皆得成就尤篤意宗族歲時

燕會惟以耕讀相勸勉或舉經史一二端相問難且樂施與里中有困乏者輒賑給之而於鰥寡孤獨尤加矜恤迄今鄉黨稱道不衰生平嚴氣正性一介不苟晚年居家課訓子孫不預外事歲時祀其祖先必誠必敬常痛其父卒於黔省未得歸葬與人言及潛然淚下每囑其子曰我大事未終天地間罪人也我死當葬以藁諸子曰王父母不得歸葬時勢爲之也吾父能奉曾王父還里合葬祖塋是繼王父之志以盡子道復何恨然終不能釋

然抱痛以歿嗚呼獻賊猖獗屢犯川境彼都人士  
率多遊滇黔以避其燄其不幸而爲溝中瘠者不  
知凡幾公以髫齡丁末世父兮母兮魂消異地陟  
岵陟屺淚洒南天卒能於流離困苦中揭祖還鄉  
奮志經史倡道蜀南寧非歲寒之松柏疾風之勁  
草耶傳曰天道無親常與善人詩曰燕及皇天克  
昌厥後今其子孫寢昌寢熾固知天之報施誠不  
爽也爰爲立傳以俟輶軒之下採者

郭孺人傳

彭端淑

孺人姓郭氏係汾陽之後廣文千三郭公冢女也幼聰穎聞兄輩讀書便能記誦其祖克廣公授以孝經內則諸篇理蘊俱達公曰若爲男必能光大門閭年二十歸彭君金相時翁姑年皆六袞家素貧舌耕於外孺人承顏順志菽水爲懽及沒而佐夫葬祭如禮孺人朝夕紡績語諸子吾爲女紅猶汝輩之爲學學不勤業不精苟或輟則前功棄此吾所以身勞心安也既而嗣君湜舉於鄉數年金

相棄世孺人率諸子力勤耕讀至孺人年七十其生母九十考終弟與妹皆無存者孺人以女代子率諸姪備禮合葬父墓焉其後湜官武強迎養值河水溢隄民瀕於死命湜速發倉廩賑之湜先給災黎一月糧然後陳請上官躉之不罪孺人歸期年湜亦解組又數年而病篤奉以肉羹不食曰我生之日與佛同我將死不肉食矣卒年八十有四

彭崑山傳

彭肇洙  
丹稜

隆昌縣家崑山公諱璋者與洙先人皆自楚麻城遷蜀或同出徵君後兩家譜俱失由來不可考矣從其孫濱得讀公行述乃爲公傳其本末公本世家子遭獻逆避難於黔承平後自黔還蜀家室蕭條貧無以爲資而公方以九歲孤幸伯兄仲兄漸已成立於是互相師友奮志於學夜不能具燈則燒松枝爲光長吟達旦又拾籜爲紙嚼竹爲筆研炭爲墨雖辛苦流離不肯稍廢蓋欲以續先人之

隆昌縣志

卷三十六

傳

二十五

業也及長能文下筆如瀉或一日書數十籜不倦出而試遂冠軍食餼於庠當是時公方卓然自命謂取巍科如拾芥耳乃屢躓場屋幾得復失喟然嘆曰嗟乎是固有命存耶於是絕意進取以其業教授生徒於鄉里間凡經指畫皆有法度可觀多成名就業雖布衣疏食居荒邱茆屋中淡如也年七十餘以歲薦得選射洪訓導將行兩兄年踰八旬鬚眉皓白笑而阻之公曰吾寧願仕將以酬吾籜債耳宦四年而卒臨卒顧其孫濱曰吾力學積

行不獲一第其將在汝等耶汝父以明經老汝又落副車勉之勉之務期上達以慰吾志慎勿忘乃祖燒松書籜時也公篤於友愛昆弟析居以兄子多而已子少取其產剖爲七而已居一焉嗚呼此亦可以愧天下之厚己自利雖骨月不相恤者矣贊曰世傳車胤孫康囊螢映雪事余未之信或偶戲爲好事者遂筆之以爲佳話耳乃觀崑山公行述始信其真士君子不從困厄中奮然特立其與庸俗何異是烏可以成敗論哉故傳其本末以貽

其孫濱使後之凡爲子孫者知自勵焉

彭湜傳

進士 觀察 彭端淑丹稜

公諱湜字文瀾號北溪雍正乙卯登賢書任武強令兼署饒陽安平諸縣旋題吳橋調繁也在武強時值水災請於上官得穀數萬石以濟饑捐棉衣三千餘件以濟寒民始不大困焉邑有故太守子郭維卒於靈壁任追逋官債家徒壁立寡妻幼子貧不能自存茫無所措公爲百計經畫以償之又令其族人經理餘貲以爲母子終身計鄉民有出外營生久而不歸者家人欲嫁其婦聞於官公召

隆昌縣志

卷三十六

傳

二十七

至婦嗚咽流涕不能語公曰若當待若夫給以日用之費未一月而夫歸家室得全此其仁愛之心雖古所傳龔黃卓魯寧有加耶夫積善之家必有餘慶考公先世代有隱德十一世祖震瀛公以孝友聞十二世祖威崖公以德行著皆封朝列大夫崇祀鄉賢曾祖汝敬公任貴州銅仁府推官歸蜀值獻逆之變斂所屠男女骸骨壘墳二塚葬於黔峯之巔題曰萬人墓至公能克紹前德施政於民蓋其所由來者漸矣

郭千三傳

彭肇洙

郭公諱垣字千三其先世由山右從麻城明洪武初復徙蜀十一傳而至公籍潁隆昌公幼聰敏好學及長爲諸生試必冠其曹隆固衝衢兵燹後老師宿儒殘滅已盡數十年無舉於鄉者公與吾家治良公決然奮起其爲文一以通今學古爲尙尤邃於史甲午同登賢書自是邑中文學之士彬彬蔚起科第聯綿不絕者公之力也性恬淡不慕榮利晚歲成名無意進取改授邑州學正復陞夔州

隆昌縣志

卷三十六

傳

二十八

教授兩郡諸生沐其教者力學敦行至今仰之其在巴也嘗以疑案脫王生於獄士林稱之時有僧以孔聖像與佛老並祀者公謂三教不並祀禮也即令移其像其在夔也值丁祭太守及署令公出供祭不虔牲用牝公云祭用牝非制也其曷敢違叱吏更之太守聞而是之其生平守正不阿類如此仕夔三年推陞知縣公以老辭遂致仕其別諸生詩云遙思三徑菊翠色滿蒼苔足以知其志矣逍遙林下十餘年而卒嗟乎余未獲從公遊曩在

京時聞隆人談公事甚悉公嘗誦余文喜之囑其  
家他日必托余爲傳余文烏足以重公感公之言  
遂爲紀其大畧云

彭鉞傳

彭肇洙

公邑諸生也秉性誠篤幼讀書便自刻勵初試童子即獲售屢困棘闈奮然曰吾家世以科第顯獨至吾而嗇之意者待兒輩耶遂棄舉子業篤志養親與人然諾不苟非禮者以直道平之人號爲公直君子邑民某家有鬼崇川中遭此物者家必破公初未之知也忽到伊家聞空中語云彭某□人來矣我輩留此何爲鄰里某外出病中爲鬼所縛叫至公名鬼即解縛而去公之格及異物如此次

隆昌縣志

卷三十六

傳

二十

子湜果以乙卯鄉薦任直隸武強令調繁吳橋以覃恩贈文林郎

彭大貴傳

平遠唐德一邑人

明季貢生彭大貴者倜儻疎豁富於貲樂與人共  
緩急適縣饑官倉儲不給紛紛者且四出大貴蹶  
然起曰擁厚實而令闔邑流離非仁也且其關係  
亦不在此於是發家藏數十困設粥於各庵觀以  
拯之三閱月而四境寧帖無恙時川撫抗某聞之  
親檢得實欲以其事人告大貴曰吾自急桑梓耳  
豈以是沽名耶堅不肯撫軍嘆息給扁對各一而  
去扁曰出粟救荒對云三千儲粟流恩遠四境生

隆昌縣志

卷三十六

傳

又三十

靈活命多祠堂內昭然如昨日事夫輕數千石之  
粟視若一芥活數萬口之命斂無德容豈太史公  
所謂篤於仁義奉公上者乎昔卜式出粟助邊武  
帝酬以官不受漢史稱爲長者然式無特意始終  
好名耳大貴深識洞遠早爲世道人心計向使隆  
萬天崇間大家巨族能落一毛以贍各邑安得流  
民累世致闖獻起而相資令斯民屠戮爲之一空  
哉而若輩所爲坐擁者何在子孫且不能保矣大  
貴後嗣領鄉薦明經累代不絕至今列膠庠者無

下數十皆其子姓積善餘慶信然

隆昌縣志

卷三十六  
傳

三十一

董子能傳

孝廉 秦先明 邑人

董子能諱興賢原籍湖廣宜章人也父名榮閣生子能兄弟八人獨子能自幼傑出魁梧有過人才幹慷慨慕義具果毅心胸最愛恤者孤寡獨不畏者強橫奈家貧學而未成惟躬耕孝養以事雙親康熙初年

朝廷有招安四川之詔遂奮然曰大丈夫志在四方豈鬱鬱久居此哉於是挈家入川路過廣安遇同鄉友三十餘人悲啼一處子能就問曰爾等先來必

隆昌縣志

卷三十六

傳

又三十一

得樂土安居矣何尙倉皇失所如此衆告以報墾斯土已經栽插一年忽被豪衿何某者霸占欲將我輩盡行驅逐因此含冤未伸子能噉嘆息者久之於是挺然出力訴經前撫軍年公批查核實而三十餘家盡得安居無恙子能寸土不受一介不取乃遷處隆昌東鄉之柳汁灣卜居閒僻越三年復歸楚迎母賀氏偕兄弟八人來隆分以田宅不稍吝惜地固近場市凡市中窮苦者濟之游惰者規之施棺木於貧不能葬者作鄉耆三十餘年

排難解紛秉公持正鄉人素悅服歷來邑侯如房  
趙諸公咸旌以聯額且素性酷愛讀書人嘗對予  
言曰吾等來川豈徒溫飽哉必須讀書明理以光  
宗祀方了吾念鄉里中讀書能文者俱以優禮待  
之其妻楊氏亦能相夫教子里中稱賢婦人焉子  
五人皆成立諸孫亦奮志力學孫諱維新者更潛  
有得早食

國餼當事悉以國士期之要皆子能積原流光之徵也

易曰積善之家必有利慶子能之謂歟年七十三

隆昌縣志

卷三十六

傳

三十二

卒葬於周興塲右蓮花山予自幼爲所敬禮又屬  
在姻婭其生平行事無不童而習之今董族譜成  
予樂得而傳之

熊準傳

熊 臯

兄諱準字北鑰伯父仁趾之長子吾族之大宗子也敦厚簡默強記勤學少訓於祖長成於吾父試輒居優吾父以遠大期之也令與松叔肄業錦江書院山長高名辰以其恬靜而篤學也器重之丙子得倉溪縣某薦而不中遂教讀吾始師事者九年而吾以乙酉應鄉薦自是從遊日衆遠近成名者數十人蓋本家傳以爲教教必勤嚴文必守法道義之資不計多寡品端行潔故學宗之癸丑縣

隆昌縣志

卷三十六

傳

三十三

左嚴延教其子得謁李明府贊曰吾愧子游君其澹臺滅明者殆一習聞而未獲一見與迨予宰陽平延兄來署三年而後返壬戌壽終年七十有九合嫂墓葬於祖妣墓前傳曰克儉法祖與人無猜教士四十載鄉試十二科命雖不遇教澤猶存其吾氏之人傑歟

熊臯傳

大理寺卿 孟 邵 中江

公諱臯字鶴鳴叙郡隆昌人其先世曾祖夢卜祖  
生員溫父增廣生如獬皆以文學名公幼而穎異  
十歲能文十九列黌宮乾隆乙酉舉於鄉年甫二  
十四敦倫立品課讀外無餘事故子弟族黨多游  
庠食餼乾隆辛丑大挑授天彭司鐸教諸生以德  
行爲先次及文藝彭之人士自戊申以後與鄉薦  
者多出門下乙卯夏籤掣山東莘縣令嘉慶甲子  
邵以大理卿乞休道經公治聞公承辦河工三次

隆昌縣志

卷三十六

傳

三十四

兵差九年日夕辛勤不倦同僚咸嘖嘖稱公爲能  
時東省有蝗蝻公率官民捕逐令曰捕蝗多者得  
重賞以此蝗入境而不爲災上司曾令代范邑散  
賑公輿僕之資皆自備范人服之公明於吏事而  
緩於刑嘗言治民如行兵攻心爲上誠有以作其  
愧恥之心自不至於作奸犯科有貢生爲水溝訟  
其徒公訊詰得情援往事以開導不面折而愧服  
求去莘士習淳樸鮮茂才公下車延明師訓廸暇  
則親較其優劣逾年而文風丕變彙童有懷金求

售者至其門而不敢言其愛民重士大都類此故  
莘民德之有真讀書官之頌戊辰夏聞公因公罣  
吏議旋有後任誤劾虧缺若干奉文封及原籍吉  
撫軍澈底查報咨還原物而公晏然無事爲歸田  
計適公之次子原任墊江縣教諭陞授知縣未到  
任而歿公聞之悲痛成疾夏五月卒於濟南歷山  
頂寓中長嗣前中江教諭銘元聞凶奔喪扶櫬而  
歸資斧藉諸莘民行李蕭條惟遺書數百卷而已  
嗚呼作宰十年清風兩袖沒之日歸里且無資亦

隆昌縣志

卷三十六

傳

三十五

可憫矣視世之以官場爲竒貨積累以利其子孫  
誇耀於鄉閭者其爲人賢不肖何如也吾嘗謂州  
縣一官爲天子撫民有裨於民生有功於國計而  
且貽子孫以清白士君子服古入官能如是是亦  
足矣如公者豈獨有後於隆抑亦牧民者之則也  
公以乾隆辛酉年生享壽七十在任時已恭膺

覃恩勅授文林郎

唐德一傳

富順縣  
訓導

杜源琳

公諱德一字長民號棠溪其先本楚黃籍自明洪武初入蜀卜居金鵞歷十三世皆以衣冠儒術著父岳麓公入成均以文行鳴於時子四公居長幼穎悟而端凝喜讀書垂髫即有神童目年十七入邑庠值父歿於豫聞訃哀毀欲絕即日奔喪不半歲扶櫬還殯於祖壟奔馳萬里往返遄速咸疑純孝之有神助也雍正丙午舉於鄉丁未登明通進士授山東平原縣令爲政本乎經術摘姦發伏若

隆昌縣志

卷三十六

傳

三十六

神明而濟以仁恕民不忍欺故治蹟冠一時先是邑有曾氏者所聘妻爲邑豪佔奪屢訟不能伸公始至立訊得情即令當堂完配捐俸爲贈而置豪於法邑人咸誦戴之越二載引疾歸邑人士知公廉斂貲以獻公堅辭遮道祖送數十里不止將出境有夫婦抱幼子執香伏道左而泣涕者即公下車時所全曾氏夫婦也吁慈祥廉惠如斯誠無忝乎民之父母矣公奉母孝撫諸弟成立友愛備至嘗曰養親課子弟乃天倫之真樂讀書培人材爲

儒者之實務其他富貴若浮雲耳非吾好也性溫原嚴重雖晏處語言有度舉止以禮六世同居家庭雍肅無間言而慷慨好施其在京謁選時有同鄉趙聖佐令雲南以解銅虧折禁大理獄逾限將抵法公立捐千金爲償出之於獄義聲滿都下歸里後以講學著書自娛屢掌金鷲琴山江陽三書院及門入翰林者孫今延董元度二人舉鄉薦者二十六人貢成均者二十八人其他列庠序者百餘人蜀南文風之盛自公始弟德隆德達皆邑庠

生德嘉以成均任昭化訓導乾隆丙午重宴鹿鳴時公年踰八十三弟皆登耄耋人方之四皓兼名其里爲仁壽里焉亦偉矣哉嘗聞太上立德其次立言其次立功有一於世則可傳之不朽公孝友素著述作滿家培文教扶危弱而其服官居鄉可師可法者更難枚舉此立德立言立功三者兼之洵足傳矣卒年九十一子三孟元仲元皆庠生叔元乾隆丁酉孝廉皆能紹其箕裘也

唐德嘉傳

邑訓 劉一衡 內江

公諱德嘉字樂君其先明初自楚入蜀世居隆昌八世祖可封隆慶進士授廣東學政九世祖登儁萬歷進士累轉七省叅政俱祀鄉賢從茲科第蟬聯至今不替衣冠之盛邑中稱望族焉昆仲四人惟公居少幼失怙依伯兄長民先生撫育教導長民博學鴻才爲蜀名孝廉性孝友待幼弟甚篤而公亦謹飭順從依戀如事□然甫授一經過目輒不忘講說即曉大意稍長經史古文辭靡不咕畢

隆昌縣志

卷三十六

傳

三十八

深奧處亦能會悟且出人意表蓋秉宿慧也長民嘗曰有弟若是豈僅傳拾青紫哉吾家陸機也年十六補弟子員學使以騰驤相視繼隨長民宦山左平原令時庶吉士孫今延董元度皆受業長民公同講學於平原書室名課一時庚午長民解綬歸里宦橐蕭然家計益蹙連年授徒遠方不獲家居恒以太孺人春秋高家事窘爲慮公食餼未數載赴棘闈不售即以養母及家務自任冀紓兄憂朝夕承顏伺意侍奉萱堂經紀家事不辭勞勩怡

悅諸兄暇則研究百家暨堪輿圖象諸書而尤精業於岐黃曰濟世之道莫善於醫昔人謂功同良相洵哉見人有疾如自嬰罹延招不避風雨道路艱阻必往藥便則濟以藥無給以方總以痊而始快無論貧富溫煦藹如曾無巖岸嗇吝是以人皆親愛樂就如父母咸以仁人長者稱之丁酉八成均甲寅銓選昭化縣訓導甫任事即勤考課訓飭士子以敦孝友篤實行為先六閱月卒於官年七十有九公賦性醇謹仁厚事諸兄如父及皆登

耄耄一堂白首相對怡怡孺慕可挹六世同居毫無間言閭里曰爲德門稱道弗置一衡曰唐公負軼逸之姿穿穴經史不獲掇巍科歷顯要以建樹清晏而僅以司鐸酬其志數亦竒矣然敦行仁厚至性孝友稟於天者厚也由明迄今簪笏濟美世有達人蓋亦詩書之浸潤道德深厚文子文孫承繼繼蘊極必發賢俊挺生然也至於以醫濟世志在活人此又孝弟之念發而不能自己於心者同仁一視親疎無間百世下聞風者當何如也

耿東升傳

乙丑進士何增元璧山人

公諱東升字向高叙州府學庠生隆昌人公先世由楚北孝感入蜀世居隆邑父炳侯公廩膳生早世公九齡失怙並無昆仲事母以孝聞公自幼好學不倦久困童試年至三十有奇縣府兩試俱冠軍始入郡庠一應鄉試未遇以母老不樂仕進家居教授生徒公長子象恒月如先生乾隆丁酉選拔次子象樞靜軒先生歲貢生俱係公庭訓成名並未出就外傳孫履端煦亭爲元戊午鄉試同年

隆昌縣志

卷三十六

傳

四十

亦係公庭訓補弟子員後始就外傳煦亭同年與余在京邸聚處數載述公之事甚詳公獨子早孤而事伯叔及待堂兄弟輩友愛甚篤鄉人多有以爲同胞者公業師周孝廉之鼎錢孝廉重義家俱式微公爲之經營墳墓數十里外奔走不遑歲時伏腊均爲設祭數十年如一日公有田數百畝自奉甚儉而於貧苦親鄰從無吝嗇親戚有耕公之田者每年租穀聽其自納不計多寡佃戶有六七十年未經更換者至於族人之寒者衣之饑者食

之無力婚嫁殯葬者周之更不可勝數公曾司齋  
長於學中應辦事宜無不盡心經理而縣署詞訟  
從不干預生平無隻字入公門鄉里咸以長者稱  
之公壽至八十五歲卒以煦亭同年貴  
貶贈文林郎平谷縣知縣夫積善之家必有餘慶  
以公之孝友勤學樂善好施其奕葉之蔚起者自  
無庸元之諛頌而公之盛德懿行爲不可沒也樂  
爲之傳

熊殿元傳

熊 臯

殿元邑諸生也潭之長子娶程氏生一女年二十五卒嗚呼胡不壽也少寡言笑五歲就學諸童嬉戲若不見聞人不以爲靜也羣目爲愚乃年未成童早諳孝行其祖母異居晨適寢所候起奉盥水暨茶湯夏扇枕簟冬溫被褥每在家習爲常於父母諸類此予聞而異之繼聞其便不向日月更深拜北斗不食牛犬肉常買魚放生此佛性也讀古人書學孝親而敬祖學敬天而愛物此豈凡庸之所能爲與學之爲言效也此子解得此字將作吾家駒矣壬子來天彭讀書應鄉闈臨場患血症而歸明年春以疾終其妻程氏誓志守節撫姪思慶繼其後噫又異矣貧乏之家孝子節婦交濟其美斯亦僅見者可令其湮沒不傳哉

彭氏傳

內閣中書 李輝斗 邑人

彭氏者雍正乙卯舉人諱湜公次女也其父官吳橋氏年甫九歲隨母至署紡績弗輟父謂之曰來此猶勞十指乎氏對曰兒家居見親族釋女不僅勞十指兒習此不爲勞也父亦不爲之禁年十八適內邑儒童喻宏榮榮疾家貧無以爲生翁姑命夫婦寄居母家紡績所出度翁姑所欲得以進未嘗自私也年二十二生一子一女不育榮疾益篤氏侍湯藥無懈越二年榮故氏泣血哀毀欲以身

隆昌縣志

卷三十六

傳

四十三

殉母諭之曰汝上有翁姑汝不可死汝夫無子汝何不撫猶子爲己子以延夫嗣氏於是含悲飲血茹荼食蓼晝夜勤苦紡績倍於前蓋將代夫壻以養翁姑亦俟夫弟有子因而撫嗣之也未幾翁姑偕逝撫子不果氏親視衾含備極哀踊繼以夫嗣莫續零丁無依遂大歸以終餘年歲壬申三月初九酉時卒年六十有七守節四十有五氏姪庠生廷烈爲余述其行並述其永訣之言曰婦人之義節孝爲大而尤以守其孝節盡其孝延其宗祧爲

大吾以未亡人而据拮艱辛事翁姑無違於禮而終不克使夫子之有後何以相見於九泉願他日母以涇涇小節挽彼彤管嗚呼氏之所不欲傳者乃其所必傳也氏之以爲不可傳者乃其所不可不傳也使氏而易其所操寧遂孤苦若是哉古人云修短隨化終期於盡與其若彼而死母寧若此而死哉彼宏榮之餘魂又寧以力盡而死而卒以無後求多於氏哉余故樂爲傳之以備輶軒之採

萬上選傳

副榜 孔廣其 邑人

萬上選者楚之江寧人也康熙壬辰生年十歲隨李永泰入川永泰無子撫上選壓長改姓名爲李安元買業邑南李若花岩而居焉時家無餘丁安元稍長一切夫役耕種貨財出入皆屬於安元家漸豐裕而置產倍於前後永泰連生六子友愛一堂第知爲兄不知爲萬也永泰臨終爲安元娶妻力辭分產七分命伊承受已分又堅辭不數年永泰之妻故三年麻衰外又吃報母齋三年六弟亦

隆昌縣志

卷三十六

傳

四十五

感泣奉爲家督輪流供食必豐無事唯以釣魚自適至嘉慶丙辰年八十有六是年以壽終諸弟姪葬於祖塋之側君子曰此所謂愚者耶夫愚者烏能出其才力與人家事而漸致豐裕也不然其冥情者耶禮曰飲食男女人之大欲存焉無不有其室家而利其財產也然吾聞樓峯之巔鷲洞之側徃徃多高人異士隱見出没寄跡於邨落農圃家勤苦操作優游卒歲至後人尋其端倪而不可得其言茲若人之儔乎若永泰之父子生而骨肉之

彭氏傳

內閣中書 李輝斗 邑人

彭氏者雍正乙卯舉人諱湜公次女也其父官吳橋氏年甫九歲隨母至署紡績弗輟父謂之曰來此猶勞十指乎氏對曰兒家居見親族釋女不僅勞十指兒習此不爲勞也父亦不爲之禁年十八適內邑儒童喻宏榮榮疾家貧無以爲生翁姑命夫婦寄居母家紡績所出度翁姑所欲得以進未嘗自私也年二十二生一子一女不育榮疾益篤氏侍湯藥無懈越二年榮故氏泣血哀毀欲以身

隆昌縣志

卷三十六

傳

四十六

殉母諭之曰汝上有翁姑汝不可死汝夫無子汝何不撫猶子爲己子以延夫嗣氏於是含悲飲血茹荼食蓼晝夜勤苦紡績倍於前蓋將代夫壻以養翁姑亦俟夫弟有子因而撫嗣之也未幾翁姑偕逝撫子不果氏親視衾含備極哀踊繼以夫嗣莫續零丁無依遂大歸以終餘年歲壬申三月初九酉時卒年六十有七守節四十有五氏姪庠生廷烈爲余述其行並述其永訣之言曰婦人之義節孝爲大而尤以守其孝節盡其孝延其宗姚爲

晏紹祖傳

李春暄內江進士

公晏姓諱紹祖字繩武名下士也世居隆邑北關外其先父列邑庠諱怡子凡五公行三少穎悟好讀書善爲文以家訓入泮旋食餼肄業錦江屢列高等奈文章憎命達十八棘闈遇終艱也寡識者毋乃謂詩書誤人而公篤好之窮年矻矻手不停披借祖祠爲講學地日攜子姪輩循循誘未嘗或倦其談文目力極高非天崇諸大家輒吐棄如是者亦有年遞庚申學使陳爲公知音一試拔子姪

隆昌縣志

卷三十六

傳

四十七

三人入膠庠人咸艷稱之僉曰盛哉乎斯族公姪諱源者暄舅家壻也談公事甚詳公性孝友諸兄早沒父母俱享大年公事之甚謹雖課讀在館而定省未嘗一日缺公二子二兄無嗣卽以次子承其祀蓋友愛原於天性也善飲酒不喜獨酌數杯後縱談慷慨聲動鄰屋事有定慮利害險阻不能奪壬申春適過訪幸獲拜謁暄時甫弱冠睹風度聆言論旣退仰慕公者久之越丙戌冬再往過焉登公之堂衣冠巍然視君之顏古貌岸然其氣清

其神肅其言厲篝燈下子若孫行行序立不敢贊  
一辭暄目擊之亦瞿然起敬唯唯聽命公曰予年  
八十矣足不履城市者數十年嗟嗟公之學不可  
及公之品亦未易幾也邇年來暄以未膺

簡命株守鄉曲公孫棻從暄遊文章品概紹公家傳預  
卜其大成可爲乃祖光自一世以至萬世子子孫  
孫永無窮然而公之澤甚長公之品之學俱未可  
沒也暄謹筆其大凡俾百世下猶得穆然想見其  
爲人

郭書傳

耿光祐

郭瑞庵先生諱書以理學名於世幼聰穎異常人咸以黃童目之甫十齡射童子科爲文宗所深異顧謂曰世有皓首窮經莫能相及者矣若之何遽能構此卒以年幼抑其卷而許次考錄之及科試年十二遂游庠自是歲科屢爲諸生冠年十八舉於鄉公車北上數不售貧居教授生徒以品行器識爲先每講經論史援古證今隨事諄諄告語累千百言不倦自我隆及江陽人士先後景從以數

隆昌縣志

卷三十六

傳

四十九

百計屬文專務根柢雅不尙鋪張兩邑中文章巨手咸出其門會截取屆期入都銓授粵西興業令公故廉明而性慈愛每笞盜皆回首不忍加視未期年盜風以靖邑有監生坐法懼罹重刑屬公弟某以三千金求賄免公聞而痛絕之及訊戒飭示懲而已後因公呈議例得復官上游素重公將列牘於廷公執不可曰人生適志耳吾何戀升斗爲遂掛冠歸里一琴一鶴宦橐蕭然興業士民祖餞不絕於道多爲之歔歔流涕云公歸授徒原塾著

有耕餘草文集行世邑令仰公德望延聘主講蓮  
峯書院四方來學之士歲百餘人一時文教昌明  
士風丕變科名踵發凡終始沐公教澤者二十餘  
年邑令某奉檄彙考稔公品學求襄校公引嫌固  
辭不獲適堂兄某卷極佳屢置第一每出案皆粘  
文於壁竟拔登案首人無間言蓋鑑空衡平足以  
服物如此公雅善攝養平生鮮嗜好獨喜食魚尤  
能以辨理之心辨味江陽樓峯間各溪產魚公嘗  
味能知其所自出漁者獻魚妄引一溪試公烹嘗

郎察其僞也居常誠心待人市物不計值物有值  
百而詐值千者公償千其人徐悔曰吾不願負心  
實值百也敢還其九所謂不欺人而人亦不忍欺  
之者卒年七十有餘子三人長毓恒次毓文俱庠  
生三毓才生男三人人壹毓恒出庠生人九人極  
廩生毓文出

耿履端傳

堂伯祖旭亭公諱履端與李公輝斗俱吾邑開科進士舊志載郭于蕃實以邑人通富順籍故開科自公始公生而穎異舉止邁凡兒髫年學於家塾爲之傳者公祖向高公父靜軒公伯月如公余先曾祖也講說字義輒能領悟稍長屬文具倜儻不羈之概然愈自斂抑朝夕勤學終始不倦每師遠出同學嬉遊於外公獨閉門潛課如恒時性至孝善承親意父母有盛怒幾諫則解不區區於奉養

故其孝非世俗所及道昆季四人公居長待羣季以和然務嚴重有失教必面斥之月如公常語人曰異日光吾宗必此子也年及冠遂游庠從富順名進士李公復元游復元者李吉山先生高弟也授徒故峻門牆公特與登龍爲及門所不及得盡其所學以歸時向高公年髦矣語人曰吾孫履端終必成大器吾雖老其中式當及見之嘉慶戊午果登鄉薦第五人逾數年向高公始沒庚午授徒高峯寺歲饑斗米千錢富室某存粟數百石於寺

假邑典印封焉公啟封而賤售之石粟錢三千持簿登記貯錢以俟封者富室控諸縣令先是縣令某稱壽斂錢公執其簿事遂已令深銜之至是索公售粟簿存案陰覓人仿公書跡題其籤曰替天行道將褫公而治之罪郡守張公稔公之爲人者也褫牒再至郡再駁之適郡守詣省過邑令某持簿力搆公郡守執簿焚之深責令險惡而召勉公且助以金促赴春官試明年辛未公遂成進士以雅不善書登三甲歸班考授咸安宮教習三年報

滿授直隸平谷令平谷地瘠民貧風俗簡樸公順其土性而化導之三年報囹圄空虛焉旋以憂去官歸里先後主講榮昌暨邑書院門人田純粹輩多所成就兩邑邑乘皆成公手至今稱信史公服闋之官豫省補西平令西平號繁劇丁糧尤重終歲催科無暇晷嘉慶季年銀值落每兩易錢八百歷任易銀徵錢浮於值之半公歷任銀值增如所收公仍之邑進士陳務本言於公曰公豈能挾資作令耶今若此後將不勝公曰吾苦無善政及民

若遽更張人其謂我何坐是賠累綦苦性寬仁每  
比催糧役不過笞三十幕賓有爲公言者曰若輩  
積猾法不嚴虧挪且甚公曰糧固重其欺隱漫無  
發覺遽加重刑不忍也且笞三十輕耶若盍試之  
頻年公欠甚夥然雅不喜爲人道苦上蔡令徐公  
績臣以鄉戚兼寅好嘗於除夕前二日詣署請見  
公配趙孺人徐公曰此間比鄉居樂乎孺人曰鄉  
居樂此間不樂也歲逼矣國課未完將提叅之爲  
懼何暇聚歲徐公慨然助數千金報解獲免吏議

公好培士類縣試將終覆富室某文與一寒士埒  
而詩字過之公擬甲富乙寒矣而其人躁妄干進  
因禮吏言於公戚願以五伯金爲壽某乘間偶及  
宦况清苦少洩之公大怒斥某而薄富者乃當堂  
揭曉甲寒士而擲富者案後邑人頌之公取人約  
而其爲與也則奢同鄉周大宣輩公車北上繞道  
謁署絮袍裊敝公取所服裘易之爲措重資以贈  
尤篤於師道南省趙解元者失其名公延教次子  
月修至五十金供奉比於養老役僕也不惜重賞

然絕不使預公事故終任無上訟豫撫楊海梁者  
陰察公廉能奏調唐縣將蒞官十日以病卒於豫  
貧無力歸葬堂叔春山公長嗣也請於楊撫軍暨  
公同歲生豫藩林少穆爲倡義助資並集諸寅好  
贈賻千金扶柩歸里葬於耿洞灣之祖塋咸豐十  
一年辛酉署邑令魏公魯樵以重修邑乘屬余堂  
兄光貞執公畧而言曰吾先祖之行而不傳於後  
豈惟余咎抑亦子之責也余曰唯遂盡實而爲之  
傳

李可菴先生紀畧

孝廉 鄒嶧賢內江人

先生諱輝斗字映南行一可菴其號也其先世湘南人譜隸西平世爲隆邑大姓公生而聰慧幼讀書有穎悟嘗從事於吾邑孝廉高玉溪先生恒以國士目之射童子科輒列前茅歲戊午余負笈於富邑江陽書院始得見其人其時公已入庠食餼有年矣余素仰其名幸與同遊得親其言論風采其爲人厚重深沉語言蘊籍勤於學朝夕無倦容時仙溪劉藩臣綿竹唐君扶隆邑耿旭亭與公俱

隆昌縣志

卷三十六

傳

五十五

以文章名噪一時而劉唐耿諸君以戊午辛酉相繼騰達公猶抱一領青衿講道河汾采藻采芹遊其門者咸各分其餘技以拾青紫而公猶皇然制舉子業不衰也歷名場者又十餘年庚午舉於鄉辛未成進士承明射策

欽點內閣中書嗚呼可謂榮矣先是公爲文揣摩時樣每取先輩名程曲意倣摹務爲博大數上不售乃宗其派於陳勾山先生益以清剛卒以此獲賞於房考太史張公蓋太史亦素業勾山者也鍼芥之

投若合符節繼以宦囊羞澀請假歸里甲戌春赴  
京供職爲道梗不果至乙亥乃趣裝以行不意歷  
事年餘未得珥筆

彤庭而竟修文地下也嗟乎讀書半生艱難歷徧入  
翰墨之場而故爲之坎坷其遇以老其才旣幸適  
意矣而又默促其算以羈其神於地寒風勁之鄉  
燕臺縹緲誰招異域之魂泉路蒼茫終作他鄉之  
客天之位置斯人何其慘歟於是有爲公憤者曰  
詩書之誤人甚矣今可菴不業詩書則不得科名

不得科名則不得歷碌金鷲而遺其櫬於薊北公  
之厄詩書招之也又有爲公慰者曰業詩書者多  
矣成科名者幾人士有博通經史而湮沒於深山  
窮谷者何可勝道如可菴者名揚親顯死亦何辭  
是二說者一則援氣數以咎詩書一則重科名以  
殉氣數余謂業詩書以淑身取科名以應世得科  
名而厄於數變也守其常順其變而何咎乎詩書  
何嫌乎氣數就令憤者激昂慰者婉轉究何損益  
於可菴前人有言修其在己聽其在天居易以俟

命吾是以謂之君子

隆昌縣志

卷三十六  
傳

五十七

劉定選傳

耿光祐

劉公玉山諱定選以武甲科歷官軍門吾邑之偉人也祖應明國學生父經常不仕其母賀太夫人於乾隆庚戌正月值電光燭室適產公遂陰異之公故業文然幼好武兼有遠畧嘗聚羣兒山堡間選敵己者爲酋對結營壘儼具埋伏抄襲接應諸格律戰勝攻取各以其勢蓋兒時志趣如此稍長讀書明大義文章清越歷歷有佳致雅善書尤耽吟詠屢隸文考皆前列卒不售叔元標者精射藝

隆昌縣志

卷三十六

傳

五十八

公往觀射每自試輒中因兼習技勇隸武考受知於郡守某公冠武案郡守曰此童射藝十三屬冠也是年文試猶拔前茅竟屈文而伸武嘉慶丙子舉武孝廉預夢一鷹立於大樹醒而異之爰賦一律有參天古樹攀初上健翮秋鷹立不傾之句丁丑成進士歸次山東道有詩云青徐連野綠海岱出雲蒼千里馬疲雪五更人怯霜絕不類武人口吻歸後養堂依戀承色笑者二年復入都辛巳夏選授鄖陽守備於時國家隆平將弁安晏練兵餘

暇賦詩作字嘗射後臨帖有詩云安排筆陣爲雲陣敢愛翎毛厭兔毛以是文名藉甚爲上將所希珍戊子由卓異陞授貴州天柱營都司壬辰題補清江協右營遊擊丙申以緝匪賴長亨等百餘人丁酉秩滿並案入覲己亥由部掣補湖南岳州參將暎夷入寇奉檄赴廣東協剿辛丑聞訃丁父憂乞歸守制不許四月與暎夷大戰於白帝廟凡六晝夜虜獲甚眾捷聞欽賜花翎六月奏凱回營論功保列一等十二月崇陽鍾人杰等作亂衆至數

萬通山通城均被佔據檄公馳赴湖北蒲圻堵剿公以部兵不滿五百堅壁未動壬寅正月初五日賊脅醜十餘萬水陸並進逼蒲圻攻撲甚數公曰賊衆我寡未可力勝且俟其懈而擊之逾數日賊果懈公將兵出城大敗之斬獲數百次日賊環匿附城民居屯積火攻諸具於內公令士卒飛石碎瓦擲火彈於瓦隙民房焚烈賊冒烟突火而走公開門引擊擒戮甚衆正追殺間會武昌雙都督帶兵來援公愈奮勵夾擊賊大潰死者萬計積屍枕

藉河幾爲之斷流越數日賊復收集餘衆數萬各負束草蜂擁而至屯城外高山積草如城勢欲引火夜攻城中恟懼公倚敵樓遙望良久謂衆曰虜不出吾算中矣募軍中有胆力者二十人命之曰吾觀其草城乃空寨也遠來腹饑必就山後村庄造飯慮吾窺其虛實故積草遮蔽耳趁此速帶火攻潛往縱燒倘彼來追城上舉放號礮吾自提兵接應成功在此舉也懸重賞遣之俄頃烟漲迷天礮聲雷擊公督大隊出城一鼓徑前吼聲四震賊

方宰牲歡晏忽驚起視但覺火燄冲霄礮聲裂地倉皇亂竄不知所措公驅兵掩殺如風掃葉俘戮無算追獲賊首鍾人杰等收復通山各城罄捕餘黨安撫良民二月大功告成振旅旋營捷聞欽加副將銜先換頂戴是年復檄公於安徽蕪湖防堵嘆夷公縷陳蕪湖東西梁山形勝並堵嘆夷輪船火箭之法上書省院撫軍覽而善之旋以議和寢用公復回任癸卯升署湖南靖州副將賦有靖州十景詩其題九峯聳翠詩有云振衣能染袖多許

翹首難分天幾重餘不備載甲辰實授前任以兩湖督臣奏保陸路總兵奉命入覲歷歷戰功悉勞清問溫綸優渥恩遇特隆着交軍機記名先行回任乙巳陞授雲南昭通鎮總兵奉命入覲召見三次溫諭渥賞均逾前度陞辭賞假順道歸里省親丙午正月赴任奉檄帶兵永昌協剿回匪抵營七日告捷還任戊申正月永昌哨匪滋事以督臣林宮保奏調統轄滇黔官兵剿辦戎旌甫蒞悉衆輸誠不煩一兵輒獻逆首四月奉檄統兵施甸姚關

竹寨一帶督緝餘匪未泮旬醜黨咸獲復奉檄統兵姚州督辦累年滋事回匪公蒞境傳令勒兵分諭民衆紛紛投誠戮渠釋脅逾月撤凱姚州士民遮道焚香感激流涕公一一爲慰遣之己酉以累伐奏蒙優敘加提督銜聞訃丁母憂回籍辛亥服闋壬子入覲盛服將朝薨於東華門外旅邸同鄉范比部泰亨王孝廉炳森爲護柩歸葬於邑西之扈家岩原配氏邱繼配氏羅子二助昌邱夫人出助廉羅夫人出俱國學贊曰公以文士登武甲科

積勲累伐歷階軍門衡諸近世遇亦奇矣至於身  
列戎行不輟吟咏古人云賦詩退賊維公其備哉

耿昂傳

張澍華  
舉人陽

耿驤亭先生諱昂名宿也家世儒素祖象恒乾隆  
丁酉選拔平居授徒餘脩多以濟貧不事積產至  
父履義家益落母氏郭嘉慶壬戌誕公靈根夙植  
聰慧絕倫儀表風裁迥出塵宇束髮受書以家貧  
見父有憂色輒奮勵以娛親心於經史無所不通  
尤專治葩經妙能領風人言外意文章詩賦宏博  
瑰麗肖乎其人幼時執筆塗鴉卽合古名家遺法  
自後愈詣精妙體無行楷懸肘腕恣意揮洒無不

隆昌縣志

卷三十六

傳

六十三

渾成蜀人士談書法者悉宗仰之嘗受學外大父  
郭瑞菴先生爲所深器曰此子金馬才也以其貌  
暨所作書皆能獨出冠時何論餘技年及冠游庠  
次年掇高等又次年乙酉以科試第一人登拔萃  
科初祖象恒選拔學使屬吳公省欽及是學使屬  
吳公傑祖孫緣奇若此丙戌朝考欽取二等詩題  
尙愛此山看不足公卷有坐久雲生壑歸遲月滿  
樓之句特邀宸賞國朝隆邑選拔錄朝考者自公  
始是年余亦游京赴挑就瞻丰采翩翩年少玉樹

臨風爲嘆異者久之又七八年余以高邑儒學侍  
差戎郡而公亦以署富順學同班余曰嘻別久矣  
風神猶是也顧奈何居位亦然且以彼其才游木  
天升玉堂何所不遂而屈位在是意天將老其才  
而大之用也公曰不然吾自都歸未任樂山訓導  
中間際覃恩請貤封迎養博歡甫三年居母憂未  
已旋居父憂人生惓惓科名徒以慰二親耳今已  
矣復何爲余度其言以訪諸其親若友又知公之  
篤於奉親色養無閒非夫文人學士區區才藝之

長已也有土佃郭中隆者公父爲券貸百千已復  
貸五十千易券忘撤前券方任樂山時公文業歸  
償矣餘子穀十三石未納不及撤券公父歿越六  
年郭父子五人毀信重索謂權子母計千金於是  
伐其樹半山開墾納佃復屢登堂呼名廝罵甚或  
揮刀斫案擲器擊窗吼聲如雷家中人無不股栗  
者公扃書室爲弟輩改文歷四藝而罵不絕率如  
是者五年歲償七八十千不等族人早勸公控諸  
縣公以父故執不可最後事聞於官將緹郭而笞

之郭稍懼乞和從族鄰請典貸二百八十千息其事吁可謂宏矣厥後道光丙午銓授雅安司鐸余以咸豐癸丑游羌江圖將訪戴而公捐館易歲矣雅人從余遊者僉曰吾師驤亭先生溫厚和平如春風之被物蒙其惠者衆矣終任六年兩閱歲科試諸生有苦貧者多爲墊油紅費性揮霍毫無積蓄居恒手不釋卷時或濡墨作書以寄興晚歲草書尤神雖隻字人皆珍秘生平最嗜飲然不亂性每杯酒論文亶亶徹夜不倦也沒之日清風兩袖

有宦無囊其兩嗣君游幕劍南積脩兩年扶柩歸里德配趙孺人後公三年卒長君光祺己未中四川鄉試次君光祐戊午中順天鄉試均在英年未可限量傳曰不在其身在其子孫諒哉

耿光宣傳

堂兄光宣字輔臣咸豐壬子副榜當世奇傑士也幼隨祖履端宦豫甫四歲輒解唐詩祖鍾愛甚篤每盛怒聞解詩卽已年八歲祖歿隨父晫捧柩歸里次年就塾學屬文援古證今粲然有理十一歲隸童子試屢前列以數奇歷六學使凡十考先後郡邑正覆試冠軍十餘次皆未售中獲縣案首旋居父喪輟考坎坷潦倒鬱鬱不得志因學武於簡州孫晉揚盡其手妙以歸參閱韜鈴遂嫻武畧性

豪俠遇不平事必挫抑之口如懸河排難解紛爲鄉里所敬服邑某弟兄析產相持數年而訟不息延公至一言而解然夙有遠志終不肯廢學嘗受知署邑令牛公樹梅牛公者甘肅名進士也將考邑鄉校苦屢任殉情微易其流而倍額並取拔簽定得失彙生童共題滙考五百人錄程墨者數十卷出案公寘第一令持簽坐庭故示公拔得籤爲同人所覺大呼令不公令曰若文極佳吾固與之公不可再拔獲失籤令壯其志而惜其文曰若卷

非程墨所及不解彙童辦此固亦能覆乎曰能令  
覽覆卷曰奇士也遂收寘門下公自是名愈重於  
世云逾年琦相制蜀伐西南夷奏牛公叅軍謀公  
往謁牛公於蓉城將爲從軍計先夜寢不成寐披  
衣徬徨者再念文字終當傲命次晨入謁竟不道  
來意牛公亦深慰勉之歸從名孝廉范伯崇先生  
游深見器重自經緯經史以及泛覽百家益復洞  
見原本包孕靡遺故其爲文弼中彪外熊熊有光  
驟馳雨風揮洒立就邑人士多奉公文爲式至往

往家絃而戶誦之年二十八竟以通經解第一游  
庠次年食餼膺鄉薦初置十三名嗣房考得童棫  
卷固請易房首座主不可屬其易次房首者適當  
公卷遂寘童十三名而落公副榜由是遊豫章赴  
乃戚郭彭澤幕未數月長毛南潰震異公名令得  
生致公者賞千金公晝伏夜行至省同鄉屈貴溪  
廉得其踪聘之署言聽計從貴溪就理咸豐乙卯  
江右廉訪鄧仁塋爲先司鐸公同年生舊敦情好  
藉稔公名以軍事見招不就其子撫郡守鄧輔綸

復幣函敦聘公至省屬欽使曾國藩麾下管領一軍受任年餘大小七十戰戰皆勝欽使獎給羣英領袖匾額列保知縣公撫士卒以恩而廉威綦重信賞必罰嚴絕賄託勇無虛額額無虛糧以故士樂爲之效死運籌部署動中機要人皆信其必勝嘗著禁掠論載藝文志字挾水霜凜不可犯爲江右官民所傳讀丙辰九月以賊陷撫州攻取未下初八日晨戰於城外我師大捷公輕騎引隊數千人邀賊敗路中流礮洞穿腰穴歸不能言以手牽

筆書遺囑無一字及家事惟大書死後軍中無舉哀遂絕筆而逝是夜軍士不能禁哀爲賊所覺引全股來劫公屍歷五晝夜軍士拚死抵罵始退十三日公柩入省遺橐蕭然惟絕命詞一首餘稿數篇而已欽使以下各撫棺痛哭誄以詩文爲積腋得二千餘金十八日遣部下軍功同里許海珊送柩歸撥勇三千護出省境賊中途劫柩經護勇擊殺數百而退是年臘月公柩抵瀘丁巳春正歸葬於老宅之對山無子以弟光貞子爲子遵欽使更

名撫恩承襲恩騎尉公由知縣以同知請卹江右  
人爲集哀誄文及公禁掠論名壯節篇邗布京師  
邑人哀之爲擬建祠與肅公並列余故爲亡兄所  
器其事蹟亦獨余知之最詳雖不文其曷敢辭用  
和淚濡墨而爲公傳

陳先典傳

進士牛樹梅邑令

陳先生先典字敬齋先世本楚人康熙間別祖夫道公始遷蜀家隆昌四世至父學棟公輕財好義常破千金產周鄉里急顧早世無子德配曾孺人撫夫兄學松公季子爲嗣卽先生也先生聰慧喜讀性純孝自兒時卽恰遵母訓不苟言動食餼後就館於外日以晨昏有缺爲惓念乃設塾近里門每日課暇必歸省二次雖大風雨不改及母沒茹素三年日夕定省如生蓋實有終身之慕者事本

隆昌縣志

卷三十六

傳

七十

生父母岡弗如禮居喪盡哀不忍降服故報丁而不行冥誕忌日齋戒竭誠與所繼父母無異也兄弟子姪間相篤以愛有無言之化族中孀婦守節者獎勵倍至值公祭則迎之命婦人年長者捧酒欸接及歸贈錢物褒美以堅其志而成其節而婦女之陰化者多矣先生少讀范文正公義田記慨然欲效其所爲而未逮也晚年竭脩脯所入施養濟院又增置蒸嘗業以贍族酬夙願也故又自號曰景文其他賑荒濟危與一切倡義維俗之事率

畢力爲之孳孳如不及家龕供劉李二師位李無嗣更爲豎碣以表墓拜掃無失其教人也先道德而後文藝課文次日必取古今格言切相指示而於孝弟數大端尤爲諄諄貧士來學者脩脯不計或轉貲助之故其所成就甚廣有安定遺風先生衾影自飭誓行善過者數十年一言一行如對神明遇祭祀必齊過祠墓必下易簣前一日祝先師誕猶禮拜甚恭而記善記過亦直至臨終之日而止隆邑向無書會先生曰以言教人不如以書

勸世故自嘉慶辛未約同志爲社刻聖諭廣訓是後計本生息陸續刻丹桂籍孝經孝行錄戒淫錄人生必讀書硯田換骨丹朱楊二公家訓廣勸記醒世歌靈捷醫方福幼編達生編庚子刻三聖寶訓豁解及靈異傳辛丑又刻戒溺女文數十年印送流傳幾徧州郡制軍戴羨門先生聞之喜因其鄉試在省也傳見優禮獎諭至再今邑中各場徃往有書會蓋其及門所推衍而二三好善之士亦皆聞風而興起者也先生以明經註選未仕生於

乾隆己丑十月十一日以道光辛丑八月二十六  
日終壽七十有三門人私謚曰恭毅孺人李氏先  
生先十七載卒不復娶子孫繁衍皆能世其德云

郭光宗傳

孝廉 李茂材 邑人

邑之南有墨溪焉其地號人文藪而最著者惟郭氏辛酉秋耿公爲邑侯聘修縣志人有一節之奇無不錄而郭氏之得列者尤夥洵一門之盛也余適以公事入城遇郭君西垣持其父序昭公行述授而讀之其於富貴功名視諸族姓皆不逮獨其行如孝親友弟好善樂施諸節則公有過人者焉公六齡即失恃善事繼妣高孺人得其歡心中間公父世華公以齒繁奉伯母陳孺人別居鄭庄兩

隆昌縣志

卷三十六

傳

七十三

地稍隔公朝夕步往定省歲以爲常凡事皆先意承志致養致愛無不克善以故伯叔子弟不下數十人皆感公意雍睦無間言嘉慶二十四年世華公病篤公侍湯藥焚香夜祝願以身代及卒躡踊呼天氣絕復蘇者再聞者莫不感泣每冥誕忌日設祭號泣痛哭平時與人言及輒潛焉涕下不能自已而事高孺人父沒後孝養愈摯道光十八年孺人棄養喪葬一如其父無所遺恨弟繩武高孺人出也性揮霍每有所私累公陰償之不遺孺人

憂亦未嘗形於口二十二年與弟繩武析居知其猶負逋也不惜割膏腴售值以償期無受人催逼以慰乃父及高孺人之靈嗚呼世人孝以繼母而簿兄弟以財產而疎如公者豈易幾哉先世華公好施與嘉慶中歲饑嘗捐米數十石以濟貧上憲旌其閭曰義並炊香公慨然承父之志而力擴之遇族戚中佳子弟無力讀者輒慤慤獎勵助以膏火自小試至鄉會皆厚飲之見有關於節孝者尤不惜重資以成其美其他給喪葬助嫁娶饑食

之寒衣之但有叩其門者求無弗與鄉里沐其惠數十年至今稱道不絕道光甲辰滕君西垣入邑庠接食廩餼由是取科第如拾芥知厚德之報未有艾也始余不識公聞范宗山先生言公行事在彼族中爲第一等人范公邑名孝廉也生平爲人端毅不輕許可今按其孝親友弟好善樂施彰彰如是益信其言之不謬公諱光宗生於乾隆癸卯年八月二十九日援例入監嫡室鄭孺人繼王孺人皆貞靜慈淑與公並著子五長祖彥次祖程均

國學三祖齡四祖張廩生卽西垣五祖佑公卒年  
七十九特錄其行之大者以爲世勵

晏養齋公家傳

邑增生晏楷

叔父養齋公

諱

承浩

字

希孟養齋其號也性至孝

叔祖繩武公素剛嚴子二公行一次子承淑自幼過繼二叔祖雖獨子不事姑息一經口授輒丙夜不休稍倦則夏楚隨之平時一言拂意輒拍案呵叱索大杖公涕泣長跽請之方解而呶唔如故無怨色故四五十恂恂猶孺子焉父母皆享高年公課讀在家塾而晨昏定省食必躬親廁牖滌濯皆躬之卒之日擗踊搥捫哀毀盡禮尤勤學自言

隆昌縣志

卷三十六

傳

七十六

讀書竟夜不寐倦則繞案走冬夜火盡寒氣自足入至脛膝及股不可復忍然後就枕晨興體猶冰也其學務貫通引伸觸類相說以解爲文清真刻露戛戛獨造新奇而不詭於正庚申歲同淑叔補博士弟子員旋食餼自學使及郡縣有司試輒高等然數奇入省闈八次屢薦弗售以壬辰歲貢成均候選訓導其教人不拘一格隨材造就終日不倦倦意所不可者必面斥之電擊雷砰風馳雨驟事過復循循誘以故遊其門者詩文皆有法度舉動

必循規矩望而知爲養齋先生門下士也十餘年來從者益衆門弟子得所指授掇青紫者數十人焉公清貌頎身眉目疏朗與人交胸無畛域人一善譽不絕口其有不若理者則面讓無少諱慷慨樂義及門李公中試謝錢百釧公以邑中科名日盛而賓興利息甚微捐爲公項俾作舉貢北上之資邑侯楊慰農先生深重之揚於府尊張曉瞻先生延主蓮峯書院講席而公恬退終以疾辭不欲以城市易山林也親戚乏匱竭力拯援倡義釀

金修道路圍義塚刻楊忠愍公家訓結放生社其他義行不可枚舉終歲束脩之入竭而弗惜曰吾以此遺子孫也次子棻弟登賢書第二人捷音至公曰爲學無濟於世讀書不登於朝皆爲憾事古人明體達用皆從力行善事始余老矣汝兄弟互相師友勉之勉之公歿棻弟成進士授縣令旋改教授體公之遺訓也公春秋六十有一至節奇行士林艷稱之謹就耳聞目見者載之家乘非敢阿所好也亦以備采風者之下詢焉爾